

### **ASO LUA, 07 MATI 2023**

*Na nofoia e le Fofoga Fetalai le Nofoa i le itula e 9:25 i le taeao e tusa ai ma Polokalame o Fonotaga a le Palemene 2023/2024.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono.

### **TUSI FAAMAONIA O LE FILIFILIA**

**E TUSA AI** ma aiaiga o le Fuaiupu 84(2)(b) o le Tulafono o Faiga Palota 2019, **o A'u o TUIMALEALIIFANO VA'ALETOA SUALAUVI II**, Ao o le Malo, ua tu'uina atu ai nei le Tusi Faamaonia o le filifiliina o le sui ua taua le suafa iinei e avea ma Sui Usufono o le Palemene mo le Malo Tutoatasi o Samoa mo le Itumalo Palota o Vaimauga 3, e amata mai i le aso lenei:

### **LAUTIMUIA Ueese Vaai**

**TU'UINA ATU** i lo'u nei lima i Vailele i lenei Aso, 27 Fepuari 2023.

**Sainia: Tuimalealiifano Va'aletoa Sualauvi II**  
**AO O LE MALO**

### **FAATAUTOINA O LE SUI USUFONO FOU O LE PALEMENE**

**FOFOGA FETALAI:** A o le i afio mai le sui usufono fou o le Palemene i luma o le Laulau mo le Tautoga, ou te valaau atu ina ia e tula'i a o o'u faitauina le Tulafono Laitiiti o Amio Tualoa Faa-Palemene.

*Na tutulai sui usufono o le Palemene a o faitauina e le Fofoga Fetalai Tulafono Laitiiti o Amio Tualoa Faa-Palemene.*

### **TULAFONO LAITIITI O AMIO TAUALOA FAA-PALEMENE**

#### **FAAMATALAGA O FAAMOEMOEGA:**

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga tualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae.

O aiaiga autu ua taua ua faamoemoe e tuuina atu ai ni taiala ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

#### **O AIAIGA AUTU:**

(1) **Faamaoni i le atunuu ma ona tagata:**

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) **Faaaloalo i Tulafono:**

E tatau i sui usufono uma ona tausisia tulafono a Samoa ma puipuia aiaiga autu o lo o i totonu o le Faavae.

(3) **Faaaloalo i Tagata uma:**

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, o le lē faaituau; aemaise le faia o le amiotonu i taimi uma.

(4) **Faatinoga Lelei o Pule:**

E tatau i sui usufono uma ona:

(a) Faatulaga a latou mataupu totino;

(b) Faaaoga so o se faamatalaga ma faamatalaga uma na maua mai i o latou tofi faale-Malo; ma

(c) Faatinoina o so o se malosi po o pule na maua mai i o latou Tofi faale-Malo, mo na o le lelei o tagata lautele ma pe a fai e tulai mai o so o se tulaga talafeagai ma se tulaga moni e feteenai ai aia, pei o tulaga tau tupe a le sui usufono lava ia, tupe faaletulafono po o se aia a le sui usufono e tatau ona manaomia e

faasilasilaina atu ma le faia o so o se laasaga e aveese ai sea feteenaiga po o le lē auai atu i lena feutagaiga tau pisinisi.

**Manaoga Faapitoa mo Minisita ma Isi Tagata o lo o Umia Tofi faale-Malo:**

O sui usufono uma o lo o umia tofi faa-palemene o so o se ituaiga ua manaomia e usitaia atoatoa aloaia aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e sui usufono so o se faaopoopoga i ana meatotino po o se faamanuiaga.

**FAASALAGA:**

O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Taualoa po o e pei ona o le a fuafuaina e le Palemene.

**FOFOGA FETALAI:** Mo le faatinoina o le Tautoga, ou te valaau atu i le sui usufono ina ia e afio mai i luma o le Laulau mo le faatinoina o lau Tautoga.

Tuu lou aao taumatau i luga o le Tusi Paia, ta'u lou suafa ma faitau le Tautoga.

**TAUTOGA O LE LOTO FAAMAONI**

**“O A’U O..... OU TE TAUTO I LE ATUA E ONA LE MALOSI UMA LAVA, O LE A OU FAAMAONI MA TAUAVEINA TONU LE LOTONU FAAMAONI I LE MALO TUTOATASI O SAMOA, MA O LE A OU FAATAUNUINA MA LE TATAU AI MA LE FAAMAONI OU TIUTE E AVEA AI O SE SUI USUFONO O LE PALEMENE O SAMOA. IA FESOASOANI MAI LE ATUA IA TE A’U.**

*Na faaalua le agaga fiafia o le Maota i le patipati o latou aao i le maea ai o le faatautoina o le sui usufono fou.*

**ISI FAASILASILAGA A LE FOFOGA FETALAI**

**FOFOGA FETALAI:** O lea ua maea le fasi o le taeao ina ua malie le fatualeiga o iumatagi. Ua tatou seu foi i ata sisina aua o lea ua tua i ao malama ma le matagofie o le Atua. Ia foi pea le viiga ma le faamanu ia te

ia e le aunoa. Ua tatou oaoa ai i faleseu ma fesilafai manuia i le toe tauaofia ai o le Palemene i lenei masina e tusa o le Kalena o Aso Fono ua faamaonia. O paia, o sa foi ma faiga o le Palemene, o mamalu lava e le aveva, e tumau e oo i le faavavau.

I le afio o lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta faapea foi a outou Afioga i Minisita Lagolago.

Afio lau Afioga i le taitai o le Taitai o le Itu Agai ma le mamalu o sui usufono uma o le Palemene. Malo le soifua manuia ma le lagi e mama i lenei taeao fou.

E faatalofa atu foi i le saofaiga a Ofisa Sili o Pulega o Matagaluega ma Faalapopotoga Tumaoti a lo tatou Malo ua mafai ona tatou faatasi i lenei taeao. Malo afua ailao ua maua.

Le faafofoga tapuai mai a lau Afioga i le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma lou Faletua, lau Afioga i le Faamasino Sili ma le mamalu o le Faamasinoga. E faapea foi si o tatou atunuu i ona tafa e fia, e le gata i Samoa nei, ae so o se tuluiga o le lalolagi.

O le paia aua Aiga ma Tama, o Tama foi ma Aiga, le usoga a Tumua ma Pule, o Ituau ma Alataua, Aiga i le Tai ma le Vaa o Fonoti.

E ofo alofa atu ma faatalofa atu lau Palemene i lenei taeao. Faamalo le folau, malo le onosai.

E le faagaloina foi le tapuaiga a nai o tatou uso i Sasae, i le afio o le Kovana Sili ma le Lutena Kovana, le Peresetene ma le Maota Maua, le Fofoga Fetalai ma le Maota o Sui. O paia lava ia aua Sua ma le Vaifanua, Fofu ma Aitulagi, Saole ma Saleaamua ma le Launiu Saelua, tainane Tootoo o le Faleula, Faatuiolemotu ma upu i le Manuatele. Matou te faatalofa atu i lenei taeao fou.

Ae a le tapuaiga a Ekalesia Kerisiano uma i totonu o le atunuu, faamalo le soifua malo foi le galulue.

Ona afe mai lea o se upu a le Fofoga Fetalai i le tatou Maota nei, e faigata le faalepa i le nofoia o nofoaga mo tagata lautele ona o le faamoemoe o le faatautoga o le sui usufono fou mo le itumalo palota o Vaimauga 3, e pei ona tomua ai tualumaga i lenei taeao. Le paia o aiga ma le maua o le itumalo. O paia aua le afio o Toomalatai o le Alosina, alaalatai le Faletolu ma le Vainalepa, susu mai oe Tuisamau. E faapea foi le afio o le Matua ia Tofaeono, afifio Asi ma Patu, afifio Aiga e Tolu. Afifio le Usoalii ma le Gafa, alaalatai Sa Ataga ma le nofo a ituaiga ia Fuata.

Afifio foi oulua Matua, afifio mai Usoalii, afio mai Salevalasi ma Aiga, Susu Alo o Malietoa, alaalatai le Fetalai ia Atoa ma Fuaiupolu ma le Vainalepa. Faamalo le faatoatoa, faamalo fai o le faiva.

Matou te faatalofa atu i lenei taeao fou i le suafa manumalo o Iesu Keriso. E fia faaleo foi se faamanuia a le Fofoga Fetalai i le pale mai o le Afioga ia Lautimuia Ueese Vaai i le tauaveina o le nofoa o le itumalo palota o Vaimauga 3. E i ai lava le talitonuga ua faaaupegaina oe i le potu mai le Atua e tusa o lou valaauina aua o pule uma e mai le Atua ia. Ia sagai ane ai o le tai, ia maua lou finagalo faapalepale ma le loto onosai, ae sili ona maua le loto faatauva e tafatafafa i ai sou finagalo.

Ia saga faamanuia le Atua i lou tulai mai i le tauaveina o le Nofoa o lou itumalo. Faamanuia le Atua i le tapuaiga a le faletua ma le nofo a alo, o aiga aemaise le paia o le itumalo.

Le alofaiva o le Palemene i lenei taeao, ia, agalelei le Atua i usugafono a le tatou Maota.

## SAUNOAGA O MALIU

*Na faasilasila e le Fofoga Fetalai i le mamalu o le Palemene le tuumalo o le Afioga ia TUAOPEPE Fili i le aso 17 Fepuari 2023.*

O le Afioga ia TUAOPEPE Fili na ulua'i filifilia i le Palemene i le Paeaiga Lona 10 mai i le 1988-1991, o se sui usufono mo le Itumalo Faaalaalafaga o Lefaga ma Faleaseela.

Sa avea o ia ma sui usufono o le Komiti o Talosaga faapea le Komiti o Faamatalaga o Tupe a le Malo.

O ia o se sui o le Vaega Faaupufai e Puipuia Aia Tatau a Tagata, le HRPP.

E avea ai lenei avanoa e fai ai a'u ma sui o le Palemene e molimoli atu ai faamafanafanaga ma faamaisega i le Faletua ma le Nofo-a-alo aemaise o aiga ma le Itumalo, ona o Lē sa pelē, ua toesea ona o le valaau a le maliu ma le oti.

E tusa o aga masani a le tatou Maota nei, ou te valaau atu ai ma le agaga maualalo i le mamalu o le Palemene, ina ia o tatou tutulai faatasi ma le filemu mo se minute e tasi, e faailoa ai lo tatou faaaloalo i le sui usufono ua faailagi le folauga.

*Na tutulai filemu le Maota mo le minute e tasi e faaalua ai lo latou faaaloalo i le sui usufono ua tuumalo.*

## TUUINA ATU O PEPA

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2022/2023 Nu.161, Tali a le Malo i le P.P.2022/2023 Nu.66, Lipoti a le Komiti o le Vaega Tau le Va Fealoai i le P.P.2021/2022 Nu.13, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2020/2021;
2. P.P.2022/2023 Nu.162, Lipoti Faaletausaga a le Auaunaga o Vaa a Samoa mo le Tausaga Faaletupe 2021/2022;
3. P.P.2022/2023 Nu.163, Lipoti Faaletausaga a le Pulega o Felauaiga i le Laueleele mo le Tausaga Faaletupe 2021/2022;
4. P.P.2022/2023 Nu.164, Lipoti Faaletausaga a le Matagaluega o Galuega, Felauaiga ma Atinae Eseeese mo le Tausaga Faaletupe 2021/2022;
5. P.P.2022/2023 Nu.165, Lipoti Faaletausaga a le Pulega o le Suavai mo le Tausaga Faaletupe 2021/2022;
6. P.P.2022/2023 Nu.166, Lipoti Faaletausaga a le Faalapotopotoga o Inisiua Tau Soifua a Samoa mo le Tausaga Faaletupe 2021/2022;
7. P.P.2022/2023 Nu.167, Lipoti Faaletausaga a le Faaletupe Tutotonu o Samoa mo le Tausaga Faaletupe 2021/2022;
8. P.P.2022/2023 Nu.168, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2021/2022;
9. P.P.2022/2023 Nu.169, Tali a le Malo i le P.P.2022/2023 Nu.93, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.74 & P.P.2021/2022 Nu.21, Lipoti Faaletausaga a le Komisi o Galuega a le Malo mo Tausaga Faaletupe 2019/2020 & 2020/2021;
10. P.P.2022/2023 Nu.170, Lipoti Faaletausaga a le Pulega o Taulaga mo le Tausaga Faaletupe 2021/2022;
11. P.P.2022/2023 Nu.171, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa 2021/2022;

Ma le faaloalo lau Afioga.

## TUUINA ATU O LIPOTI A KOMITI FAA-PALEMENE

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2022/2023 Nu.147. Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le

- P.P.2022/2023 Nu.48, Lipoti Faaletausaga a le Ofisa o le Loia Sili mo le Tausaga Faaletupe 2020/2021;
2. P.P.2022/2023 Nu.148, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.70, Lipoti Faaletausaga a le Ofisa o le Komesina o Sulufaiga mo le Tausaga Faaletupe 2021/2022;
  3. P.P.2022/2023 Nu.149, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.73, Lipoti Faaletausaga a le Matagaluega o Faamasinoga ma Pulega Tau Faamasinoga mo le Tausaga Faaletupe 2020/2021;
  4. P.P.2022/2023 Nu.150, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.129, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2021/2022;
  5. P.P.2022/2023 Nu.151, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.130, Lipoti Faaletausaga a le Penisione a le Palemene mo le Tausaga Faaletupe 2021/2022;
  6. P.P.2022/2023 Nu.152, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.131, Lipoti mo le Faiga Palota Laitiiti 2022, Itumalo Palota Gagaifomauga 2 a le Ofisa o le Komisi o Faiga Palota;
  7. P.P.2022/2023 Nu.153, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.144, Iloiloga o Tulafono Tau Aiga a Samoa, Lipoti Faaiu 25/22 a le Komisi o le Toefuataiga o Tulafono a Samoa;
  8. P.P.2022/2023 Nu.154, Lipoti a le Komiti o le Vaega Tau le Va Fealoa'i i le P.P.2022/2023 Nu.50, Lipoti Faaletausaga a le Iunivesite Aoao o Samoa mo le Tausaga Faaletupe 2021/2022;
  9. P.P.2022/2023 Nu.155, Lipoti a le Komiti o le Vaega Tau le Va Fealoa'i i le P.P.2022/2023 Nu.72, Lipoti Faaletausaga a le Pulega o Tinei Mu ma Faalavelave Tutupu Faafuasei a Samoa mo le Tausaga Faaletupe 2021/2022;
  10. P.P.2022/2023 Nu.156, Lipoti a le Komiti o le Vaega Tau le Va Fealoa'i i le P.P.2022/2023 Nu.74, Lipoti Faaletausaga a le Matagaluega o Aoga, Taaloga ma Aganuu mo le Tausaga Faaletupe 2021/2022;

11. P.P.2022/2023 Nu.157, Lipoti a le Komiti o le Vaega Tau le Va Fealoa'i i le P.P.2022/2023 Nu.90, Lipoti Faaletausaga a le Faalapotopotoga Faavae Tau Fatugao a Samoa mo le Tausaga Faaletupe 2021/2022;
12. P.P.2022/2023 Nu.158, Lipoti a le Komiti o le Vaega Tau le Tamaoaiga i le P.P.2022/2023 Nu.89, Lipoti Faaletausaga a le Faalapotopotoga o Suesuega Faasaienisia Samoa mo le Tausaga Faaletupe 2021/2022;
13. P.P.2022/2023 Nu.159, Lipoti a le Komiti o le Vaega Tau le Tamaoaiga i le S.R.2022/2, Tulafono Faatonutonu o le Faafoega o Lafoga (Polokalame Faaletoroni e Mataitu ai Faamatalaga o Oloa Faatau ma Lafoga) 2020;
14. P.P.2022/2023 Nu.160, Lipoti a le Komiti o le Vaega Tau le Tamaoaiga i le S.R.2023/1, Tulafono Faatonutonu o le Pueina o Ata Tifaga (Kamupani o le Landing Limited) 2022.

Ma le faaaloalo lau Afioga.

#### **LAFO FAATU A TAITAIFONO O KOMITI FAA-PALEMENE**

**FOFOGA FETALAI:** Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae lau Afioga Auuapaa Mulipola.

**Afioga AUUAPAAU MULIPOLA ALOITAFUA MULIPOLA (Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga i le Fofoga Fetalai, e talu ai e le i maea lelei iloiloga a lenei Komiti i galuega o le a taua, o le ala lea o le tulai atu ma le faaaloalo e faatu le Lafo, *Ina ia tusa ai ma aiaiga o Tulafono Tumau 166(2), e talosagaina ai se faatagaga a le Fono Aoao Faitulafono mo se taimi faaopoopo e faamaea ai Iloiloga a lenei Komiti ma toe lipoti mai ai i le Fono Aoao i le Fono ia Me 2023.*

1. *P.P.2022/2023 Nu.57, Lipoti o Galuega a le Ofisa Suetusi a Samoa mo le Tausaga Faaletupe 2019/2020;*
2. *P.P.2022/2023 Nu.59, Suega o Galuega Faatino i le Tapenaga a Samoa mo le Faatinoina o Sini Taiala ma Atinae Faaauau, Anagata ma Gafataulimaina 2022;*
3. *P.P.2022/2023 Nu.64, Lipoti a le Ofisa o le Suetusi Sili Aoao i Luga o Tulaga Faaletonu mo le Tausaga Faaletupe 2019/2020;*



4. *P.P.2022/2023 Nu.133, Lipoti a le Ofisa o le Suetusi Sili Aoao i Luga o Tulaga Faaletonu mo le Tausaga Faaletupe 2020/2021.*

*Ma le faaaloalo.*

*Faaluaina e le sui usufono mo Faleata 1 ma le sui usufono mo Gagaifomauga 2.*

*Na faamaonia le lafo.*

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi lau Afioga Faleomavaega Titimaea Tafua.

**Afioga FALEOMAVAEGA TITIMAEA TAFUA (Taitaifono o le Komiti o Tupe Maua ma Tupe Totogi):** Lau Afioga i le Fofoga Fetalai, e talu ai e le i maea lelei iloiloga a lenei Komiti i galuega o le a taua, o le ala lea o le tulai atu ma le faaaloalo e faatu le Lafo, *Ina ia tusa ai ma aiaiga o le Tulafono Tumau 166(2), e talosagaina ai se faatagaga a le Fono Aoao Faitulafono mo se taimi faaopoopo e faamaeaina ai Iloiloga a lenei Komiti ma toe lipoti mai i le Fono Aoao i le Fonotaga ia Me.*

1. *P.P.2022/2023 Nu.71, Lipoti Faaletausaga a le Faaputugatupe o Faamanuiaga mo Tagatanuu Matutua o Samoa mo le Tausaga Faaletupe 2021/2022;*
2. *P.P.2022/2023 Nu.88, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2021/2022;*
3. *P.P.2022/2023 Nu.128, Lipoti Faaletausaga a le Faletupe o le Atiina A'e o Samoa mo le Tausaga Faaletupe 2021/2022.*

*Faaluaina e le sui usufono mo Falealili 2 ma le sui usufono mo Aana Alofi 3.*

*Na faamaonia le lafo.*

## **ILOILOGA O LIPOTI A KOMITI FAA-PALEMENE MA TALII A LE MALO**

**P.P.2022/2023 NU.3, LIPOTI A LE KOMITI O LE VAEGA TAU LE TAMAOAIGA I LE P.P.2020/2021 NU.64, LIPOTI FAALETAUSAGA A LE MATAGALUEGA O PISINISI, ALAMANUIA MA LEIPA MO LE TAUSAGA FAALETUPE 2019/2020.**

**P.P.2022/2023 NU.63, TALI A LE MALO I LE P.P.2022/2023 NU.3, LIPOTI A LE KOMITI O LE VAEGA TAU LE TAMAOAIGA I LE P.P.2020/2021 NU.64, LIPOTI FAALETAUSAGA A LE MATAGALUEGA O PISINISI, ALAMANUIA MA LEIPA MO LE TAUSAGA FAALETUPE 2019/2020 - ILOILOGA**

**FOFOGA FETALAI:** Tulai mai lau Afioga i le Taitaifono a le Komiti Vaega Tau le Tamaoaiga lau afioga Niuava Eti Malolo.

**Afioga NIUAVA ETI L. MALOLO (Taitaifono o le Komiti o le Vaega Tau le Tamaoaiga):** Lau Afioga I le Fofoga Fetalai ou te faatu le lafo, *Ina ia faautagia e le Fofoga Aoa le Lipoti a le Komiti o le Vaega Tau le Tamaoaiga, o lo o tuuina atu ai ana sailiiliga, fautuaga ma iugafono. Ma lou faaaloalo lava.*

*Faaluaina e le sui usufono mo Safata 2, ma le sui usufono mo Salega 1.*

*Na faamaonia le lafo.*

**FOFOGA FETALAI:** Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga NIUAVA ETI L. MALOLO:** E muamua ona momoli le agaga o le faafetai, i lau afioga i le Fofoga Fetalai i lenei taeao.

Ae manatu ae ou te lei laasia le taelega o alii o le vai o Tagaloa, ou te faatulou i le paia ua sasao nei. Aua o le lagona ua matavai o alii ma siuvai o alii le mamalu tau ee o le Palemene o Samoa. E faafeiloai i lau Afioga i le Fofoga Fetalai, e faafeiloai atu foi i le afio mai o lau afioga i le Tamaitai Palemia, le Sui Palemia le aiga Kapeneta, ae a le saofaiga o Minisita Lagolago. E faatalofa foi i le afio mai o lau Afioga i le Taitai o le Itu Agai, aemaise foi o sui mamalu o le Palemene i lenei foi Itu o le Palemene nei.

E faatalofa foi i le sui mamalu e pei ona i ai le faamoemoe o lenei taeao, lau afioga i le sui usufono Lautimuia Afoa Ueese Vaai, po o lau fetalaiga foi Malolo. Ua malo le pale afio mai ma tala mai o aao.

E faatalofa foi i le tapuaiga mamalu i Le Ao o le Malo ma le Masiofo, le Sui Ao ma le faletua, aemaise foi o le tapuaiga a Samoa aoao.

E faatalofa i le afaigaluega tofofi a le Atua o lo o talafaauto i itu e fia o Samoa, aua le asuina o le ipuvai o le Ola, o le galuega tau le Atua e fesootai ai le lagi ma le lalolagi, e faatalofa atu i lo outou paia ma lo outou mamalu.

O Samoa ua potopoto e faatalofa, e faatalofa foi i le saofaiga a le Paia i Ofisa Sili o Pulega, Ofisa Sili Lagolago, aemaise foi o le afio mai o lau afioga i le Tamaitai Loia Sili.

E faatalofa i le Faamasino Sili, aemaise o le Peresetene o Fanua ma Suafa ma le Ofisa o Faamasinoga.

E faatalofa foi i si ou itumalo o tapuai mai. Ona o lea ua tamua lo tatou vaa i lenei taeao, ia tapuai maia sei fai le Lipoti e pei ona tuli mai ai Niuava, aua lenei taeao.

Lau Afioa i le Fofoga Fetalai, o le aotelega o sailiiliga, matafaioi ausia e pei ona i ai le Lipoti e pei ona lupepe nei i luma o le Laulau-a-Fono. O le Lipoti faale-tausaga o lo o iloiloaina, o lo o faailoa mai ai galuega faatino a le Matagaluega ma ana taumafaiga ina ia faataunuu le manulauti a le Malo, e ala lea i le tapenaina o le siosiomaga lelei e uunaia ai le atinaeina o pisinisi tumaoti, ma faatupulaiga avanoa faigaluega talafeagai mo tagatanuu o Samoa.

O lo o faamauina, e ui i le feagai ai ma luitau o le Koviti-19 i lea tausaga faaletupe, ae sa mafai lava ona ausia nisi o sini autu faataatitia.

### **Sini Autu 1: Atinae Vaega Tumaoti ma le Faafaigaluegaina o Tupe mai Fafu.**

O lenei sini o lo o galulue faatasi ai le Matagaluega ma le Faalapotopotoga o Meatotino Tau i le Atamai (WIPO) e faatu se lala mo faailoga o Oloa ma Fefaatauaiga i Samoa nei. O le faamoemoe, ina ia mafai ona fesoasoani i le augaosi oloa ma i latou o maketiina oloa i le tapenaina ma le faaleleia o faailoga i luga o oloa mo le maketiina i fafu. Ua faamauina, e na o Samoa lava le atunuu o le Pasefika o lo o auai i totonu o lenei Faalapotopotoga faatasi ai ma isi atunuu o Asia.

O lo o faaauau pea le auai atu o Samoa e fai ma sui i nisi o Maliega Faava-o-Malo mo meatotino tau le atamai ma e 3 nisi o Maliega fou Faava-o-Malo, na sainia e Samoa i totonu o le tausagas faaletupe o lo o iloiloaina. O nei maliega e aofia ai le Feagaiga Faava-o-Malo ma le Faalapotopotoga o Pateni (Patent Corporation Treaty), Maliega Faava-o-Malo o le Hauge, e puipuia ai mamalu i Oloa Gaosia (Hauge Agreement) ma le Maliega faava-o-Malo o le Lisbon, e faamauia ai i luga o Igoa ma Faailoilo Nofoga Patino o ni Oloa Gaosi (Lisbon Agreement)

O le a fesoasoani nei Maliega ua sainia e Samoa i le au faipisinisi e faalautele ai le silafia mo le faalauiloina ma le maketiina o a latou pisinisi, puipuia a latou faailoga mo fefaatauaiga ma oloa gaosia. E le gata i lea, ae o le sailia o ni auala e faaleleia ai le maketiina o oloa gaosia i atunuu i fafu, faapea ma totonu lava o le atunuu.

**Sini Autu 2: Faamalosia le Siitia o Oloa Gaosia ma Fefaatauaiga Talafeagai ia Ausia Faiga Faatauvaga Lelei ma le Amiotonu.**

E talu ai ona o le le usitaia e nisi o pisinisi ma faleoloa o aiaiga o Tulafono mo Tau o Oloa, na mafua ai ona toe faamamaluina le Lisi o Tau o Oloa i lalo o Poloaiiga o Faalavelave Tutupu Faafuasei. E 2 lisi mo Tau o Oloa mo taumafataga na tufatufaina i faleoloa ma pisinisi uma i le atunuu e le Matagaluega, a o faagasolo vavao mo le Komiti i lea tausaga.

E 202 faleoloa na mafai ona asia e le Matagaluega mai le Itu Aana, Tuamasaga, Faleata, Vaimauga ma Anoamaa e fai ai a latou suesuega, ma e 85% na faamauina le usitaia o ia poloaiiga, ae 15% e le i mafai ona usitaia ma sa ave i ai le faamanatu ma le lapataiga.

Lau Afioa i le Fofoga Fetalai, na tali atu le Matagaluega i Polokalame Faamama Avega a le Malo mo Pisinisi Tumaoti e ala i le faalauteleina o le Polokalame Fesoasoani mo le Tuusaunoaina o tiute (CODE 121) ina ia aofia ai ma le Vaega o Faatoaga ma Faiga Faiva. O lenei fesoasoani na tuusaunoaina ai le tau o tiute mo oloa auina mai fafo aua le atinaeina o faatoaga ma faigafaiva. Na faamauina e fa (4) talosaga na mafai ona tuuina atu i le Matagaluega i lea tausaga. E 2 talosaga sa taliaina ma le isi lua sa talia nisi o faamatalaga manaomia mai lē e ana le talosaga.

O le faamaoniga mai le Kapeneta (FK) e aloaia ai ona avea Samoa ma Sui o le Faalapotopotoga o Tulaga faamaonia o le lalolagi (ISO) na mafai ai e le Matagaluega ona faatino le atinaega o faiga faavae mo tulaga faamaonia o oloa ma galuega e fua i luga o manaoga moomia o pisinisi, a le atunuu lautele ma le Malo.

**Sini Autu 3: Fausiaina o Avanoa faigaluegfa ma se siosiomaga saogalemu ma le Soifua maloloina i Galuega mo Tagata uma.**

O le aso 1 Ianuari 2020, na faamamalu ai le siitaga o Totogi Maualalo i le \$3.00 mai le \$2.30 sa i ai i le 2015. Ua mafai ona ausia lea matatia ona o le galulue soosoo tauau a le Fono Aoao Faaatafatolu, paaga sofoatasi ma le fesoasoani a le Malo o Ausetalia i lalo o le Polokalame Fesoasoani a le Malo o Samoa (Samoa Governance Support Program)

Sa mafai ona toe faaopoopo isi avanoa faigaluega mo galuega faavaitaimi i Niu Sila ma Ausetalia mo Samoa i le tausaga faaletupe iloilo. O se tasi o avanoa ua faamauina le siitia o le vaegatupe e maua mai ai mo le atinaeina o aiga ae faapea foi le Malo. E tusa ai ma faamaumauga e 2,409 tagata sa mafai ona faafaigaluega i lalo galuega faavaitaimi (RSE) a Niu Sila ma Ausetalia i le tausaga faaletupe iloilo. O se siitaga maualuga pe a fua i le aofaiga e 2,315 sa faamauina i le tausaga faaletupe 2018-2019.

O Fepuari i le tausaga 2020, na faauu ai sui e toa 46 na resitala i le Polokalame Faa-Aperenetisi ma Matata Eseese. E toa 30 na faauu a latou faailoga tusipasi. I le maea ai o le 4 tausaga ma le toa 16 mai le Matata Eseese i le Faa-Kamuta. E 121 i latou na faamauina sa mafai ona lesitala i le Polokalame Faa-Aperenetisi i le faaiuga o le tausaga 2019.

O le matafaioi tauave a le Matagaluega le faalauiloa o puipuiga mo le saogalemu ma le soifua maloloina lelei. E le gata i lea, ae o le soifua lelei o tagata faigaluega i totonu o falefaigaluega taitasi. O le tausaga o lo o iloiloaina, na sainia ai e le Matagaluega ni Maliega se tolu faatasi ma le Matagaluega o le Soifua Maloloina, Matagaluega o Leoleo ma le Pulega o le Tinei Mu ma auunaga o Faalavelave Tutupu Faafuasei. O ia maliega o le a mafai ai ona galulue faatasi e faaleleia auala mo le lipotiina o faalavelave ma faamatalaga mai falefaigaluega taitasi.

**Fautuaga 1:**

I le maea ai o iloiloa a le Komiti, e fautuaina le Malo, ina ia; Faatautaia ni polokalame faalauiloa e aotauina ai le aufaipisinisi i manaoga o maliega fou faava-o-Malo ua sainia nei e Samoa ina ia mautinoa le mulimulitai o le aufaipisinisi o aiaiga faava-o-Malo, aemaise o le fesoasoani i le uunaia o oloa gaosia i Samoa mo lona maketiina i atunuu mamao.

**Fautuaga 2:**

Vave faailoa i Pisinisi ma Faleoloa ni suiga o Tulafono mo Tau o Oloa e tulai mai i lea taimi i lea taimi aua le nofo silafia e le aufaipisinisi o suiga i Tulafono aemaise o le usitaia ma le mulimulitaia o aiaiga ua faatulafonoina. E ao foi i le Matagaluega ona faaauau suesuega ma asiasiga i faleoloa uma e le gata i le talafatai o le taulaga, ae faapea nuu i tua ina ia mautinoa o lo o mulimulitaia e pisinisi uma tau o oloa ua faatulagaina i so o se taimi.

**Fautuaga 3:**

Silasila i le faamalosiā o le maliega ua faia nei ma le Matagaluega o Soifua Maloloina, Matagaluega o Leoleo ma Tinei Mu ma auunaga o Faalavelave Tutupu Faafuasei, e fesoasoani ai i le Matagaluega mo le mataituina o pisinisi ma faleoloa ina ia mautinoa, le usitaia o aiaiga faatulafono mo le faatinoina o a latou galuega i tulaga i sootaga va lelei o galuega saogalemu ma le soifua maloloina ma faiga faatauvaga i taimi o vavao o Poloaga o Faalavelave Tutupu Faafuasei mo le Koviti-19

#### **Fautuaga 4:**

Toe Iloilo taiala o limataitaia ai le faafoeina o talosaga e tuuina atu mo galuega faavaitaimi i atunuu mamao aemaise o le filifiliga o i latou o le a faamanuiaina. Ia mautinoa le sao atoatoa o faamatalaga e tuuina atu i tusi talosaga ma ia ave le faamuamua i o tatou tagatanuu e le o i ai ni galuega aemaise o avanoa tutusa mo aiga uma e atinae ai i lenei faamanuiaga. O le popolega o le Komiti, o le tulai mai ai o nisi o faafitauli e pei o le toagaogao o le afaigaluega a le Malo ma Pisinisi Tumaoti, aemaise ai o aafiaga i totonu o aiga, e pei o le tuua na o matua ma fanau.

#### **Fautuaga 5:**

Silasila i ni avanoa talafeagai e mafai ai ona faipaaga ma ni Faalapotopotoga i Samoa nei po o atunuu mamao aua le faaaogaina o tomai ma agavaa o alo ma fanau a le atunuu ua faauuina ma umia faailoga faa-aperenitisi i polokalame a le Matagaluega. E le gata i lea o le sailia o nisi matata eseese e ese mai i avanoa o lo o i ai i le taimi nei, e mafai ona aoaoina ai o tatou tagatanuu ma maua ai ni avanoa faigaluega i lalo o le polokalame faa-aperenitisi. O le naunautaiga o le Komiti, ina ia mautinoa le alu aoga o lenei polokalame o fitaituga i ai le Matagaluega aemaise o avanoa faigaluega mo nai o tatou tagata ma le atinaeina o nai o latou aiga.

#### **Fautuaga 6:**

Faatino e le Matagaluega ni ana polokalame faaleaoaoga mo le afaigaluega e fua i manaoga o le auaunaga aemaise o suiga ua i ai i lenei vaitau. Silasila i le sailia o ni ana paaga galulue talafeagai i Samoa nei ma atunuu mamao e mafai ai ona fesoasoani i le Matagaluega aua le atinaeina ma aotauina o le afaigaluega galulue.

#### **Fautuaga 7:**

Silasila le Matagaluega i le tulaga o le faailoga ma le faaigoaina o Oloa Gaosi ma Meatotino Tau le Atamai ina ia faaaogaina le tatou lava gagana e faaigoa ai oloa gaosi i Samoa e pei o le Ava Samoa ma le Nonu. E ao foi i le Matagaluega ona silasila totoa i oloa gaosi e auina mai i totonu o le atunuu o lo o faaaogaina le gagana a le atunuu lava ia o lo o gaosia ai, ae taua le i ai ma le gagana faa-Peretania e faamatala ai oloa ina ia manino ma silafia e tagata faatau le faamatalaga patino e uiga i sea oloa.

#### **Iugafono.**

I le maea ai o le iloiloga a le Komiti, ua faaiugafonoina ai, e fautuaina le Fono Aoao, ina ia faamaonia le P.P.2020/2021 Nu 64, Lipoti faale-tausaga a le Matagaluega o Pisinisi, Alamanuia ma Leipa 2019/2020.

Ma lou faaaloalo lava.

**FOFOGA FETALAI:** Malo faafetai i lau afioga i le Taitaifono mo le tolaulauaga auiliili.

Ua i ai le manatu lau afioga i le Sui Minisita o Pisinisi, Alamanuia ma Leipa, atonu se i foi mai le tatou malologa ona faaauau lea o lau saunoaga. E pei ona outou silasila mai, o lea e femusuai ma le Taitai o le Maota, ona ua manatu tele i le mamalu lea e afifio mai.

O le mea lea, o le a faataatiaese ai Galuega a le Fono Aoa o lenei taeao, se i toe taliu mai faaauau tatou galuega.

E valaau aloaia atu i le mamalu o le tatou itumalo o Vaimauga 3, o lea ua tapena le itu lea mo la outou malu taeao. Faafetai afifio mai.

*Na faataatiaese Taulumaga a le Fono Aoa Faitulafono mo lana malologa masani i le itula e 10:18 i le taeao ma toe faaauau i le itula e 10:59 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono.

E i ai le manatu ua maua se faasiligamalosia e ala i le tautega sa alo i ai le paia o le Palemene. Faamalo le onosai i le tatou Maota.

E faataatiaese tatou Taulumaga o le malologa ua maea folasia e le Afioga i le Taitaifono o le Komiti o le Vaega Tau le Tamaoaiga le latou Lipoti e tusa o le tatou galuega o lo o faagasolo nei. Malo faafetai saunoa i lau Afioga i le Taitaifono.

E tusa ai o le faasologa o le tatou galuega, ia, a o le i saunoa le Minisita ua faailoa mai e tatou te malolo o i ai le tatou malaga mai Tutuila i le Vaega o le Tiute. Ia, e avea lenei avanoa e faafeiloai aloaia atu ai i la outou faigamalaga mai Tutuila, o lea ua faailoa mai e le Afioga i le Minisita. Ia, malo lava i la outou galuega ma ia tatou galulue faatasi aua lava le atiaaina o le tatou atunuu ma o tatou motu e lua. Malo faafetai, manuia lo outou nopi ai i inei i Samoa nei.

E tusa ai ma le faagasologa o le tatou galuega, ou te tapa ma le faaaloalo lau Afioga i le Sui Minisita o Pisinisi, Alamanuia ma Leipa mo le tolaulauina o Tali a le tatou Malo i Fautuaga a le Komiti o le Vaega Tau le Tamaoaiga.

Tulai mai lau Afioga Hon Toeolesulusulu.

**Afioga Hon TOEOLESULUSULU CEDRIC POSE SALESA SCHUSTER (Sui Minisita mo Pisinisi, Alamanuia ma Leipa):** Faafetai lau Afioga i le Fofoga Fetalai. Lau Afioga i le Fofoga Fetalai, ou te toe

tolaulauina Tali a le Malo e faatatau i Fautuaga a le Komiti o le Vaega tau le Tamaoaiga e pei ona folasia manino nei e le Taitaifono.

Ae ou te le i see atu i le tulaga o le laulauina lau Afioga i le Fofoga Fetalai o Tali a le Malo, e avatu foi le agaga fa'afetai i lau Afioga i le Fofoga Fetalai aemaise o le tatou Pulega mo le faasiligamalosia aua foi, e le gata o sui usufono ae faapea le paia ma le mamalu o itumalo ma tatou Malo asiasi mai.

E avatu foi le fa'afetai i le Taitaifono aemaise le Komiti sa o latou iloiloa le Tala Faatatau foi ma Lipoti a le Matagaluega, ae o le a ou taumafai loa lau Afioga e fa'alauina e pei ona aumaia.

O le Tali a le Malo i le Lipoti a le Komiti o le Vaega Tau le Tamaoaiga i le Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe Faaiiua ia Iuni 2020, P.P.2020/2021 Nu.64.

E tusa ai ma le Lipoti a le Komiti a le Palemene ua taua i luga ma fautuaga ua tuuina mai ai, ua tuuina atu ai i lalo tali faatatau i fautuaga a le Komiti.

### **Fautuaga 1:**

**Ua fautuaina e le Komiti le Matagaluega ia fa'atautaia ni ana polokalame faalauiloa e a'otauina ai le aufaipisinisi i manaoga o maliega fou faava o Malo ua sainia e Samoa ina ia mautinoa le mulimulitaia e le aufaipisinisi o aiaiga faava o Malo aemaise o le fesoasoani i le u'unaia o oloa gaosia i Samoa mo lona maketiina i atunuu mamao.**

### **Tali**

Ua fa'amauina e le Matagaluega le fautuaga a le Komiti. Sa faatautaia polokalame faalauiloa a le Matagaluega i lalo o le sini autu "ONEMCIL" mo le tolu tausaga (2016-2019). O le sini autu o ia polokalame faalauiloa, o le toe faalauiloina lea o matafaioi ma auaunaga a le Matagaluega i tua i nuu ma afioaga ma le aufaipisinisi, aemaise o le faalauiloaina o suiga o tulafono ma faiga faavae e u'unaia ai se siosiomaga lelei ma le faigofie e atiae ai pisinisi ma faatupulaia ai avanoa mo galuega mo o tatou tagata. Sa faagasolo nei polokalame faalauiloa i itumalo faapea Aoga Mauululuga i Upolu ma Savaii. Sa faata'atiaese polokalame a le Matagaluega ina ia faamalositia le Poloaga o Faalavelave Tutupu Faafuasei mo le Misela ma le KOVITI-19 i le faaiuga o le tausaga 2019 ma le amataga o le 2020. Ae sa faaauauina pea le faalauiloa a le Matagaluega i luga o televise, ma upegatafailagi i le taimi o le vavao ma le KOVITI-19. Ua i ai le fuafuaga a le Matagaluega e faaauau pea ana polokalame faalauiloa i le



aufaipisinisi ma le mamalu o le atunuu aua le silafia lautele o maliiega fou faava o Malo ma suiga o faiga faavae mo le faamalosia ma le siitia o tulaga i atinae faapisinisi.

**Fautuaga 2:**

**Vave faailoa i Pisinisi ma Faleoloa ni suiga o Tulafono mo Tau o Oloa e tula'i mai i lea taimi ma lea taimi aua le nofo silafia e le aufaipisinisi o suiga i Tulafono aemaise o le usitai'a ma le mulimulitai'a o aiaiga ua faatulafonoina. E ao foi i le Matagaluega ona faaauau suesuega ma asiasiga i faleoloa uma e le gata i le talafatai o le taulaga ae faapea nuu i tua ina ia mautinoa o lo o mulimulitai'a e pisinisi uma tau o oloa ua faatulagaina i so o se taimi.**

**Tali**

Ua faamauina e le Matagaluega le Fautuaga a le Komiti. O lo o faaauau galuega asiasi ma tuliloaina e le Matagaluega i faleoloa uma i Upolu ma Savaii faapea Manono ina ia u'unaia le usitaia o aiaiga o Poloaiga o Tau o Oloa sa faamamaluina i lalo o Poloaiga o Faalavelave Tutupu Faafuasei mo le KOVITI-19. O le toe faamamaluina o Poloaiga o Tau o Oloa ona ua maitauina le siitaga o tau o oloa o lo o i lalo o le Poloaiga, ma sa tufatufaina atu i faleoloa uma a o le i oo i le aso e faamamaluina ai.

**Fautuaga 3:**

**Silasila i le faamalosia o le Maliiega ua faia nei ma le Matagaluega o le Soifua Maloloina, Matagaluega o Leoleo ma Tinei Mu ma Auaunaga o Faalavelave Tutupu Faafuasei, e fesoasoani ai i le Matagaluega mo le mataituina o pisinisi ma faleoloa ina ia mautinoa le usitaia o aiaiga faaetulafono mo le faatinoina o a latou galuega i tulaga i le sootaga valelei o galuega, saogalemu ma le soifua maloloina ma faiga faatauvaga i taimi o vavao o Poloaiga o Faalavelave Tutupu Faafuase'i mo le KOVITI-19.**

**Tali**

Ua faamauina e le Matagaluega le Fautuaga a le Komiti. E pei ona faamaonia mai e le Poloaiga o Faalavelave Tutupu Faafuasei, ua tuuina mai le malosiaga i Ofisa Sili o Pulega o Matagaluega ma Ofisa uma o le Malo, o lo o i ai a latou malosiaga faaetulafono e faatino ai ia malosiaga faaetulafono, faapea ai, malosiaga o Ofisa Sili o Pulega e faatino ai Fuafuaga Mamao a le Malo i le tali atu i le KOVITI-19.

**Fautuaga 4:**

Toe iloilo taiala e limataitaia ai le faafoeina o talosaga e tuuina atu mo galuega faavaitaimi i atunuu mamao aemaise o le filifiliga o i latou o le a faamanuiaina. Ia mautinoa le sa'o atoatoa o faamatalaga e tuuina atu i tusi talosaga ma ia ave le faamuamua i o tatou tagatanuu e le o i ai ni galuega aemaise o avanoa tutusa mo aiga uma e atia'e ai i lenei faamanuiaga. O le popolega o le Komiti, o le tulai mai ai o nisi o faafitauli e pei o le to'agaogao o le aufaigaluega a le Malo ma Pisinisi Tumaoti, aemaise ai o a'afiaga i totonu o aiga, e pei o le tuua na o matua ma fanau.

**Tali**

O lo o fa'atautaia e le Matagaluega i le taimi nei le iloiloga o le Polokalame o Galuega Faavaitaimi e pei ona faatonuina ai e le Kapeneta i lana Faaiuga FK(22)06 ma o le a tuuina atu le Lipoti i le Kapeneta mo le silafia pe a faamaeaina lenei galuega. O lenei iloiloga ua talafeauga talu ona amataina le Polokalame ona o faasea ua taulimaina e le Matagaluega mai i Pisinisi Maoti ma le mamalu o le atunuu e faasino i le fa'atautaia o le Polokalame. Ona o tulaga ia, ua talafeauga ai le toe iloiloaina o le Polokalame ma tuuina atu fautuaga talafeagai e fofo ai ia fa'asea aemaise ai o le a'afiaga o Pisinisi Tumaoti i a latou tagata faigaluega ua faafaigaluegaina i Galuega Faavaitaimi talu ona a'afia le atunuu i noataga o le KOVITI-19.

**Fautuaga 5:**

Silasila i ni avanoa talafeagai e mafai ai ona faipaaga ma ni Faalapotopotoga i Samoa nei po o atunuu mamao aua le fa'aaogaina o tomai ma agavaa o alo ma fanau a le atunuu ua faauuina ma umia faailoga faa-aperenitisi i polokalame a le Matagaluega. E le gata i lea o le sailia o nisi matata eseese e ese mai i avanoa o lo o i ai i le taimi nei, e mafai ona aoaoina ai o tatou tagatanuu ma maua ai ni avanoa faigaluega i lalo o le polokalame faa-aperenitisi. O le naunautaiga o le Komiti, ina ia mautinoa le alu aoga o lenei polokalame o fitaituga i ai le Matagaluega aemaise o avanoa faigaluega mo nai o tatou tagata ma le atinaeina o nai o latou aiga.

**Tali**

Ua fa'amauina e le Matagaluega le fautuaga a le Komiti. Mo le silafia e le Komiti, o alii ma tamaitai o lo o aoaoina i le Polokalame Faa-

Aperenitisi o lo o fa'afaigaluega i a latou Matata Eseese i falefaigaluega i totonu o Pisinisi Maoti ma Faalapotopotoga Maoti a le Malo ma maua ai o latou totogi.

E luasefulu ma le fa (24) ua faamauina sa mafai ona faafaigaluegaina i le Polokalame Faipaaga o le Pacific Trade Partnership a Niu Sila (PTPNZ). O le sini autu o lenei Polokalame o le filifilia lea o ē ua faauuina ma ua i ai tomai ma agavaa i matata eseese mai i Samoa ma Toga mo le Toe Fausiaina o le Taulaga o Canterbury i le (2015-2016). Ua avea foi lenei polokalame ma avanoa e galulue soosoo tauau ai le Malo ma Pisinisi Maoti e auala atu i avanoa faigaluega i atunuu mamao aua le siitia o le soifua manuia o o tatou aiga.

E i ai le manatu o le a siitia avanoa mo galuega faa-matata eseese mo o tatou tagata ua i ai tomai ma agavaa i atunuu mamao ma ua ogatasi ai ma le toe siitia maualuga o tulaga o agavaa ma tomai ua faamaonia mo le Polokalame Faa-Aperenitisi mo le Tulaga 3 ma le 4 ua tutusa ai ma tulaga faamaonia i Niu Sila ma Ausetalia. O nei tapenaga e patino lea i maliega a Pisinisi Maoti sa lagolagoina ma totogiina le auai o a latou tagata faigaluega i le Polokalame Faa-Aperenitisi.

#### **Fautuaga 6:**

**Faatino e le Matagaluega ni ana polokalame fa'aleaoaoga mo le aufaigaluega e fua i manaoga o le auaunaga aemaise o suiga ua i ai i lenei vaitau. Silasila i le sailia o ni ana paaga galulue talafeagai i Samoa nei ma atunuu mamao e mafai ona fesoasoani i le Matagaluega aua le atiaaina ma aotauina o le aufaigaluega galulue.**

#### **Tali**

Ua faamauina e le Matagaluega le Fautuaga a le Komiti. Ua mafai ona maua avanoa e auai atu ai le aufaigaluega a le Matagaluega i polokalame fa'aleaoaoga talafeagai aua le atiaaina o tomai ma agavaa e patino i le faatinoina o matafaioi ua filifilia i ai i latou. Sa fa'atautaia ia polokalame fa'aleaoaoga i luga o upega tafailagi aemaise totonu o potu mo aoaoga. Ua ogatasi ai ma fuafuaga fa'ataatitia a le Matagaluega i lana Fuafuaga mo le Atiana'eina o ana Tagata Faigaluega i le sailia lea o avanoa fa'aaoaoga e siitia ai tomai ma agava'a mo'omia mo le aufaigaluega aua le fa'atinoina o a latou tiute ma matafaioi mo le Malo ma le atunuu. E le gata i lea, sa maua foi avanoa mo aoaoga e patino tonu i tulaga o matafaioi mo le aufaigaluega ona o le lagolago mai o Paaga Soofaatasi a le Matagaluega e pei o le Faalapotopotoga o Leipa a le Lalolagi (ILO), Faalapotopotoga a le lalolagi mo le Puleaina o Galuega e Faavae i le Mafaufau (WIPO), Faalapotopotoga a Asosi mo

le Faalauiloaina o Galuega Atina'e a le Lalolagi (WAIPA), Ofisa o Fesoasoani tau Atinae a Iapani (JICA), Polokalame o Atina'e tau Fa'atoaga (Phama Plus), Ofisa Tutotonu mo le Maliega o Fefaatauaiga o le PACER Plus (PACER Plus Implementation Unit) ma le Matagaluega o Pisinisi ma Galuega a Niu Sila (MBIE).

### **Fautuaga 7:**

**Silasila le Matagaluega i le tulaga o le fa'aailoga ma le fa'aigoaina o Oloa Gaosi ma Meatotino Tau le Atamai ina ia fa'aogaina le tatou lava gagana e fa'aigoa ai oloa gaosi i Samoa e pei o le Ava Samoa ma le Nonu. E ao foi i le Matagaluega ona silasila toto'a i oloa gaosi e auina mai i totonu o le atunuu o lo o fa'aogaina le gagana a le atunuu lava ia o lo o gaosia ai, ae taua le i ai ma le Gagana Peretania e faamatala ai oloa ina ia manino ma silafia e tagata faatau le faamatalaga patino e uiga i lea oloa.**

### **Tali**

Ua faamauina e le Matagaluega le Fautuaga a le Komiti. O lo'o faatautaia tapenaga a le Matagaluega ma le lagolagosua a le WIPO mo le fa'atuina o se Ofisa mo Faailoga o Oloa Gaosia a Samoa. O lenei Ofisa o le a fesoasoani malosi i Pisinisi Maoti i le gaosiaina o tulaga faamaonia o Igoa ma Faailoga o Fefa'atauaiga i luga o Oloa Gaosi mo le maketiina i atunuu i fafo.

O le Tulafono o Mea Taumafa 2015 ma Tulafono Faatonutonu uma e pei o le Tulafono Faatonutonu o Taumafa (Saogalemu ma le Tulaga Aupito Manaomia) 2017 o lo o galueaina e le Matagaluega o le Soifua Maloloina. O le tusia o igoa mo oloa taumafa auina mai fafo ma oloa tuuina atu i fafo o lo o faailoa manino i le Tulafono Faatonutonu. O lo o fa'atulafonoina ai oloa taumafa uma e tataua ona tusia igoa i le Gagana faaperetania ina ia mautinoa o lo o faigofie ona va'aia, faitau ma malamalama ai tagata fa'atau. O mataupu uma e taulimaina e le Matagaluega mai i ana asiasiga tulituliloa i pisinisi maoti e patino i le Tulafono ua ta'ua i luga e fa'ao'oina atu i le Matagaluega o le Soifua Maloloina mo lo latou faamalosi.

Lau Afioga i le Fofoga Fetalai, o le tali auiliili lea a le Malo e tusa ai o le fautuaga mai le Komiti. Faafetai.

**FOFOGA FETALAI:** Malo faafetai saunoa i lau Afioga i le Sui Minisita o Pisinisi, Alamanuia ma Leipa e tusa ai foi o le tolaulauga o Tali a le Malo e tusa ai o le Lipoti a le Komiti. Malo faafetai.

Ia o lea ua faafogamaua le tatou Maota i le Lipoti a le Komiti e pei ona tolaulauina e le Taitaifono ia faapea foi Tali a le Malo i Fautuaga a le Komiti pei ona tolaulauina e le Afioga i le Sui Minisita.

Ia, ou te manatu o le avanoa lenei mo se sui usufono e fia saunoa i le Lipoti a le Komiti, ma Tali a le Malo.

Ia, o lea ua matau atu o lea ua fou mai le sa o le Afioga i le Taitai o le Itu Agai. Ia, o le avanoa lenei o lau Afioga i le sui usufono mamalu mai Anoamaa 2.

**Tofa Hon LAUOFO FONOTOE NUAFESILI PIERRE LAUOFO (Taitai o le Itu Agai):** Faafetai i lau Afioga i le Fofoga Fetalai. Masalo o le a ou tamua atu ia i lenei taeao aua le mataupu ua folasia i le Maota ma ua faapena foi ona fofoga e le Afioga i le Minisita ma le Sui Minisita.

Ia, e talitonu o lea ua tea i lagi le tatou fetu taimatagi i lenei taeao aua le tatou va nonofo ai ma le Atua Soifua, ae faapea foi le tapuaiga a le itupa gafua i le aufaigaluega tofofi a le Atua i lenei taeao o lo o faanonomanu aua Samoa aemaise foi o le tatou Palemene nei.

E manatu foi o lea ua maea ona e faamaalo iuofe e pei o le faiva i tuaau le paia sautuafafafa o le atunuu aua le tapuaiga paia a Samoa o lo o faafogafoga mai.

Ia e faatalofa atu foi i lau Afioga i le Fofoga Fetalai i lenei taeao, faamalo le soifua, ua maleifua mai foi i pue o manu. E faapea foi ona faatalofa atu i le Afioga i le Palemia ma Afioga i Minisita o le Kapeneta sa faapena ona sailiili matagi i atunuu mamao, o lea ua tatou toe faatasi i lenei taeao, o lea ua momoli mai e le Atua lo outou soifua laulelei ua maua ai lo tatou taeao fesilafai aua le faaauauina o le tatou galuega.

E faapea foi le faatalofa atu i Afioga i Minisita Lagolago i lenei itu o le Maota, aemaise foi o Afioga i sui usufono o lenei foi itu o le tatou malu. E momoli atu foi le faamalo i le Afioga i le sui usufono lau Afioga Lautimuia ua faatautoina i lenei taeao fou, faamalo le pale faamalo le finau. O lea ua e papale mai. O le matou tatalo, ia maua lou malosi, maua sou finagalo aua le tautuaina o le itumalo ae faapea foi i upufai o le tatou Malo.

Lau Afioga i le Fofoga Fetalai, masalo e le tele foi se upu i lenei taeao e tusa ai ma le Lipoti, ae faamauina le faafetai. Faafetai i le Komiti ae faapea foi le Afioga i le Minisita mo le tolaulauina o Tali a le Malo, aua o lea e matau atu o le tatou Lipoti a le Matagaluega i le tausaga 2019-2020. Lona uiga ua 3 tausaga ua tuanai atu le galuega pei ona faamauina I totonu nei Lipoti.

Ia, ou te masalo ai o le tele o galuega sa fuafuaina ma faapena ona faamauina i totonu o le Lipoti lenei ai ua maea ona faatino nisi o vaega, ia vagana ai ni tulaga foi ia sa le mafai ona faataunuu ona o le tulaga o le

Koviti-19 sa aafia ai le tatou atunuu. Aua e pei o lea foi e matau atu e i ai nai vaega na sa aafia ma le mafai ona faatino ona o aiaiga o le Koviti-19.

E faamauina le faafetai i le sailiili foi ma le sogasoga o le Matagaluega i le taumafaiga o le National Branding Bureau po o se itutino lea o le Matagaluega e sailiilia ma silasila i le faailoga o oloa mo fefaatauaiga. Lona uiga o oloa e gaosi i Samoa, o oloa lava a tatou i Samoa mo le faatauina atu i atunuu i fafo, le tatou export market. E tatau ona faailoa o oloa a Samoa. O le faataitaiga; o le ava, o le koko, o le nonu, ma isi oloa faapena. O lea ua maea ona process ua faapena ona tuu lelei i totonu, tuuapaina pe tuufaguina foi. E tatau ona faalauiloa i maketi i fafo mo le faatauina atu o tatou oloa nei, o oloa lava a Samoa. Aua e manatua foi, o isi atunuu, e tau le ava o le kava, o isi foi atunuu e tau le noni o le nonu. Ia e pei o tulaga ia, o atugaluga ia e tatau ona silasila i ai ina ia maoti ma malamalama, a avatu tatou oloa i fafo i maketi i fafo, o lo o manino ma tau ai o oloa a Samoa, ma le tualga lelei, tulaga siitia ua tapena ai tatou oloa nei, ia aua ne i faaletonu. Ia fesoasoani ai i le tatou tamaoaiga, aua o tatou oloa faatauina atu i fafo o lo o feoloolo le seleni e maua ai e fesoasoani tele lea mo le tatou tamaoaiga.

Ua aumai i totonu o le Lipoti a le Komiti atugaluga ia pei ona silasila i ai i mea o faleoloa ua le usitaia le tau o oloa po o le lisi foi lea o le tau o oloa, le price control o lo o aumai e le Price Control Board, le lisi o tau o oloa lea pei ona aumai mai le 100 faleoloa sa asia, e 100%. E 15% latou te le i usitaia le lisi lea o tau o oloa.

E mafua ona ou tautala i le vaega lea lau Afioga i le Fofoga Fetalai, ona e le o natia lenei vaitau i le taugata o le tau o le soifuaga. Ae afai la o lea e le o sao ma amiotonu le aufaioloa i le faatulagaga po o le tuuina i luga o le tau o oloa, ia o le tulaga lena o lea e popoe ai le taofi, aua o le a atili ai ona taugata le tau o oloa, ona o lo o feagai pea ma le atunuu i le taimi lenei, aua o lea ua fai lava si siisii pea i luga aemaise lava mea o oloa taumafa. O le tulaga lena pei ona manatu ai, e tatau lava ona faaauau pea asiasiga nei, ina ia asiasi lelei i faleoloa ma mataitu lelei le tau oloa ina ia sao e pei ona faatulaga atu e le tatou Malo, ae aua ne i sii tele i luga aua ua fai lava si taugata o le tau o oloa i lenei foi vaitau.

O le tulaga la e taua le faatu mai o le tatou Consumer Council po o se Fono Faatonu lea o tagata faatau, mo consumers. O le taua o le vaega lea ina ia finauina ai ma faalauiloa mai o latou atugaluga i tulaga le talafeagai o lo o i ai oloa faatau mai totonu o faleoloa ma totonu o le atunuu. O le mea lea e taua ai le galulue vaavaalua ma galulue faatasi ma isi itutino o le tatou Matagaluega o Pisinisi ma Alamanuia, i le mataituina o oloa o lo o aumai totonu o le atunuu ina ia mautinoa o lo o tusa ai ma aiaiga o Tulafono, Tulafono Autu ma Tulafono Faatonutonu, ia faapea foi ma

Tulafono a le Soifua Maloloina i tulaga o le saogalemu o oloa nei mo le taumafa.

O le tuusaunoaina o tiute, o se polokalame a le Malo e manatu e tatau ona faaaauu pea. Lea pei ona aumai i le Lipoti le Code 121, ia, o lea ua faapena ona tala atu i tua ia aofia ai ma faatoaga ma faigafaiva ina ia tuusaunoaina tiute o mea o masini faapea foi meafaigaluega o lo o aumai e faaoga, aemaise lava faigafaiva. O le taua foi o lea vaega, ina ia faapena ona fesoasoani mo le faatupulaia ma le tele o i'a e maua e le aufaifaiva, e le au tautai o le atunuu aua le faatauina atu, aemaise lava le i'a lea e faatau atu i fafo, ina ia maua se tau lelei mo le faatauina atu i fafo, ia ma fesoasoani foi e tau faapau ai le tau o i'a ia faapea foi fua o faaeleeleaga a le atunuu.

O International Standards Organization, faafetai lava i le Komiti mo le aumaiga o le vaega lea o le ISO po o le faalapotopotoga lea ua galulue vaavaalua ma le Matagaluega ina ia mafai ona tuufaatasia se tatou national standard policy, po o ni alafua foi lea e fua i ai le lelei, le lelei o le quality o oloa o lo o gaosi i totonu o le atunuu. E le gata i oloa ae faapea foi galuega o lo o fai ma faatino ina ia faataoto ni alafua maualuluga ma lelei ina ia faapena ona ausia aua le lelei tapena o oloa mo le faatauina atu i fafo o le tatou atunuu. E taua foi le galulue vaavaalua ma le CODEX. O le CODEX Committee lea o lo o vaavaaia le tulaga tau i le saogalemu o taumafa o lo o aumai totonu o le atunuu. O lona uiga o lo o silasila foi i standards. E faapea foi i taumafa o lo o faatauina atu i fafo. O se faataitaiga o lea sa maua ua maea ona latou tapenaina se standards po o le alafua sili ona lelei e fua i ai tatou fuamoa. Ae peitai, o lea e maua i mea o news mai fafo ua le faaogaina e Amerika Samoa le isi tatou uta fuamoa lea sa avatu i Amerika Samoa. Ia silasila ane le tatou Matagalugea ma latou o lo o nafa ma lea tulaga ina ia faamalieina tulaga ia i se tulaga aupito sili ona lelei ina ia mafai ai ona taulia a tatou oloa ia o lo o faatauina atu i fafo aua le fesoasoani i le tatou tamaoaiga.

Siiia o le totogi maualalo, minimum wage, sa \$2.30 i le itula, 2015, sii i le \$3.00 lea la ua sii i le \$3.00. O le fautuaga se i silasila le tatou Matagaluega ua tatau ona toe iloilo lo tatou totogi maualalo lea po o le minimum wage. E i ai le taofi e tatau ona tuu i luga i le \$5.00 i le itula mai le \$3.00 o lo o i ai nei fua i le taugata o le soifuaga ua i ai nei tulaga i private sector latou pisinisi tumaoti, e tatau ona faapena se manatu e faataatia atu se i silasila ane i ai le tatou Matagaluega ma le tatou Malo.

O tatou galuega faavaitaimi malo faafetai. E i ai le taofi o lea e talanoa atu i le 2019-2020, o lea e aumai faamaumauga latalata le 5 afe tatou tagata sa galulue fafo i lena vaitau. Ou te le iloa i lenei vaitau masalo ai ua tai 10 afe pe a se fuainumera faapena o loo galulue nei i fafo. O le taua o le vaega lea e i ai lou talitonuga ma o lea e avatu ai foi se manatu ona o le tupe lea

maua mai fafo o le tatou remittances e sau mai tagata faigaluega tatou o lo o galulue i fafo. O le mea lea se i silasila ane le tatou Matagaluega ma le Malo ina ia aua ne i motusia a tatou polokalame lea, pe alu alu foi taofi tatau a ona faaauau pea i taimi uma ina ia aua ne i motusia ona e taua le tatou remittances. O le vaitaimi po o le piriota lea e talanoa i ai, 2019-2020, \$365 miliona maua mai fafo, tupe faamomoli po o remittances se tupe tele se vaegatupe taua tele mo le tatou atunuu aemaise aiga o lo o faamanuiaina i nei tupe faamomoli. O le \$365 miliona lena pei ona aumai i le lipoti pe a ma le 19% po o le 20% gross domestic products, o se pasene maua. Lona uiga e taua tele le tatou remittance lea a o le tele foi o lea vaega o lo o maua mai i tatou galuega faavaitaimi, ua faamauiina lena vaitau o le totogi sa i ai Niu Sila mo le 6 masina e au atu lava i le \$18,000 tala i le 6 masina. I Ausetalia e au atu i le \$17,000 tala Samoa i Ausetalia mo le 6 masina pe a faapea e galuega faavaitaimi lena foi vaitau sa i ai. E talitonu ai ua siitia fuainumera i lenei foi vaitau ua tatou i ai ma ua siitia foi i luga le tatou remittance ia malo a faafetai. Pau a lea o le isi vaega e soso atu ai i le vaega lea se i silasila ane e taumafai se faiga e tau faafaigofie ai le remittance faafaigofie ai ona faatino le aumaiga o tupe faamomoli i totonu o le atunuu. I lenei vaitau ua tele mau aiaiga faigata faava o Malo o lo o faapena ona faafaigata ai i se isi itu le aumaiga o tupe faamomoli i totonu o le atunuu. Ae le o aafia tatou e pei o tulaga faigata o lo o aafia ai isi atunuu mafua ai aiaiga faigata ia pei ona ou talanoa atu.

Lau Afioga i le Fofoga Fetalai e matau atu i le tatou Aperenitisi malo faafetai i le tatou Matagaluega ma le Fono Faatonu mo le tatou council i le uunaia ole polokalame lea e taua tele ia mo matata eseese ia mo tatou i Samoa ona o tatou o se atunuu tauatie ma e taua ai tele mea o matata eseese poo trades. O lea e matau atu i le au faau e 30 pei e toatele a le aufai-moli po o le aufai-letise sosoo ai ma le plama ma le fai paipa ia sosoo atu ma inisinia afi taavale ma isi matata eseese o lo o faasolo mai tua.

O se tulaga e taua tele ma lelei ia vaega ia e le matau atu i ai e pei ona folasia mai i le lipoti a o le fautuaga a ia e tatau ona taumafai atu pea e uunaia ma toe faaleleia atili pea vaega e pei ona aumai ma o lo o taumafai ai le tatou Matagaluega. O pemitā faigaluega aua o le tatou Matagaluega lenei o lo o gafa ma le faamatuina atu o pemitā faigaluega 2018-2019 ma le 2019-2020 latalata i le 500 talosaga i le tausaga faaletupe mo ni pemitā faigaluega tagata talosaga mai fafo mo pemitā faigaluega ai i totonu o Samoa nei. A o le tele o na galuega o galuega tau faleoloa mo retail atonu ua aafia ai ma Supamakeki ma tulaga faapena, faapea ia domestic mo galuega tausī tama. A o le matau atu i faamaumauga a le tatou lipoti, o atunuu ia pito i tele talosaga e maua mai ai ma lea la ua toatele latou tagatanuu o lo o galulue i totonu o Samoa e muamua Fiti, tu lua Saina, tu



tolu ia Filipaina faasolo ifo ia Niu Sila ma isi atunuu. A o le fesili? Po o a ni faiga faavae a le tatou Matagaluega o lo o faavae ai le tulaga o le faamatuuina atu o pemitā faapenei. Aua a silasila ile pemitā faigaluega nei o galuega ia mo galuega faatauoloa i faleoloa, tausī tama a o galuega e mafai ona faatino e tatou tagata a o lea e matau atu e tele ia pemitā faigaluega. Ia e pei la o Fiti tagatanuu i Fiti lea e galulue i Samoa nei ae se i silasila ane le tatou Matagaluega i le tulaga lena.

O tua i tatou private sector i le lipoti a le Matagaluega o le tatou vaega lea tumaoti e 18,295 tagata faigaluega i le vaitau lea o le Malo e 3,997 tagata faigaluega. O lona uiga a tuufaatasi e 22,292 tagata faigaluega i totonu o le atunuu. Na o le 22,000 tagata faigaluega mo galuega mautu o lona uiga o le toatele o tatou tagata o loo galulue faatoaga, o le mea lea e momoli atu ai foi le faamalo silasila i le itu lea o le atinaeina o le tatou atunuu i fua o faatoaga ma faigafaiva aua e pei o i ina lea e toatele tagata o le atunuu o lo o galulue ai e tauatia ai aiga.

I le vaega lava o le tumaoti po o le private sector o lea ou te vaai atu itupa o alii o loo maua lo latou totogi e \$2.61 sene i le \$3.60 sene tala i le itula o lona uiga o totogi o alii e oo atu i le \$3.60 i le itula o tamaitai. O le maualuga a o le \$2.60 i le itula o le vasaga lea o totogi poo le disparady lea te vaavaai atu i ai tau ina ia silasila i ai le Matagaluega po o le a se faiga e taumafai ai ina ina narrow ai pe tuuititia le va lea e tele le eseese e \$1. A tuu atu loa la le totogi i le 40 itula i le vaiaso, e fai a la si tele o le eseese o totogi, pe afai o oe o le alii ma oe o le tamaitai o lona uiga se i silasila ane lo tatou Matagaluega i ni faiga faavae e fesoasoani ai i tulaga lea ina ia tau faapaleni ia totogi ia pei ona matauina i totonu o le tatou lipoti. Lau afioga i le Fofoga Fetalai faafetai mo le avanoa. Ia faamanuia mai le Atua lenei aso i le tatou Fono.

**FOFOGA FETALAI:** Malo faafetai mo le saunoaga foi i lau afioga i le Taitai o le Itu Agai po o le sui usufono foi o le tatou Itumalo o Anoamaa Nu 2. Faafetai foi le tausī taimi toe 15 tatou minute.

O le avanoa lea mo se tasi e fia saunoa. Ia lea ua matau atu ua faamalieina uma le Maota i le folasaga a Komiti, ia o le avanoa lea mo lau afioga i le Taitaifono mo se talifuaitau foi i le saunoaga a le Taitai o le Itu Agai. Onosai mai a lau afioga i le Taitaifono lea ua maua atu le sui usufono mo Vaimauga 1, tuu atu le avanoa.

**Afioga SULAMANAIA FETAIAI TAUILILI TUIVASA (Vaimauga 1):** Faafetai mo le avanoa i lau Afioga i le Fofoga Fetalai. E fia fai foi se sao o lenei Itumalo i lenei Lipoti 19, 20 i le Komiti foi ua tamaoiga ua opea i le Maota.

E muamua ona faatalofa ma ofo alofa atu lenei Itumalo Vaimauga 1 i lau Afioga i le Fofoga Fetalai. Malo le faatautaiga o le sa o le atunuu aemaise o lou valaauina. E faatalofa atu foi i le afio mai o lau Afioga i le Tamaitai Palemia, lau Afioga i le Sao Faapito, o le Sao Papa, o le Sao Falenaoti. Ia viia le Atua ua toe taliu mai fanua le siigagasegase foi sa malaga atu ai, ia o ou mama na, faamanuia le Atua e tusa ai ma le taitaiina o le sa o le atunuu.

Afioga i Alii ma Tamaitai Minisita, malo le galulue o lo o tatou i ai i lenei vaitaimi faigata, ia agalelei lo outou valaauina aemaise foi Minisita Lagolago.

Liliu mai i lenei itu, e faatalofa atu foi lau Afioga i le Taitai o le tatou Itu aemaise foi afioga i sui usufono mamalu o le Palemene. E faapitoa se faatalofa a le Vaimauga i le Vaimauga 3, ia malo o ou mama na. O le Vaimauga o le Aiga e fai a ma vaai mai o le numera 1 lea, talanoa e fuafua le talanoa a le tagata i lona ia numera a o lenei itula e momoli le agaga faafetai i lau afioga i le Fofoga Fetalai i le Komiti. O le agaga faafetai o lenei itumalo. Ua talanoaina i totonu o le Palemene Lipoti a Komiti taitasi, o le agaga faafetai lena a lenei itumalo, tele o le taimi sa iai foi e le i tagofia e komiti a o lou agaga faafetai ina ua taunuu mai i le Palemene ma tofi au i totonu o mea nei o Komiti. O le agaga faafetai lena. Sa ou galue ai ma matamata ai lea foi la ua toe oo mai lenei itula o lo o galue pea.

O tulaga foi o lo o i ai le tatou Malo o Komiti e tele na malamalama ma vaai i tulaga o faatamoega ma le galueaiina o si tatou atunuu. E matau la o le agaga i lenei taeao lau Afioga i le Fofoga Fetalai, faafetai i le Atua ua talanoaina Lipoti ma faataua le galulue ai o Komiti e pei o le Lipoti i lenei taeao. E momoli le agaga faafetai o le mataupu muamua e fia talanoa lenei foi itumalo i le taua o lenei Matagaluega ua tatou i ai i lenei taeao, e matau a ma le totoa i le tele o lipoti ia viia le Atua i lo outou valaauina ma le galulue ai.

Muamua ou te fia talanoa i le mea lea o le price control ou te faafetai ona ua tulaga foi le faigamalo ua tuanai sa aveese le tulaga lea o le price control ina ia taumafai e fai tauvaga, faatauva mo pisinisi le maualalo o le o i lalo o oloa a o lea la ua matau lenei itumalo faafetai. Ma o le tatalo foi lenei ina ia toe faamalosia le price control ina ia faaitiitia ai le siitia maualuga o le tau o oloa. Aua a leai se price control i le taimi lenei i le taugata o le soifuaga ia ua tafili saunoa a le faipisinisi ia i lana tau aemaise a le taimi lea ua sioki ai ia oloa tuai mai fafo ou te lagolagoina le toe faataua o le tulaga lea o le price control lau Afioga i le Komiti, tulaga i le maliega i le va o Matagaluega o le Malo ia e lagolagoina faafetai lea foi tulaga.

Ae i le tulaga o lo o matau o le vaega i laisene pisinisi. E le o po se lilo o lea e matau o le Falemai ma le Leoleo lea e i ai a o le Matagaluega lea o Tupe Maua ou te masalo o le isi vaega tele lea e tatau ona i ai totonu i le

fesootaiga lea ma le Matagaluega o Leipa. O le uiga o lau talanoa e le o po se lilo lau afioga i le Fofoga Fetalai ma le paia o lenei Maota i le oi o le atunuu i le faafouina o laisene, tulou ae avatu foi sau tuualalo o le a le mea e le tuu ai loa laisene uma a pisinisi i lalo o le Matagaluega lenei o Leipa? Aua o lea e matau o latou ia o lo o resitala ai Pisinisi ma Kamupani e o uma a e resitala i lalo o le faamalu lea o le All Register Company i lalo o le Leipa. O lau ia la tuualalo i le Komiti ma lenei Maota le a la le mea e le o uma ai loa pisinisi e le gata i kamupani o sole trader e restala i lalo o le Leipa ina ia mafai ai ona faafaigofie ai i le oi lea e oi ai le atunuu i le laiseneina o pisinisi.

O le tulaga lena lea e popole ai le sui usufono ona ua le gata ua due le taimi lea i le masina ua tuanai ia Fepuari, a o le o la o laisene le laiseneina la ua i ai o pisinisi le laiseneina ona o le faafaigata e faatino ai e le Matagluega lea, O le tatalo o lea e i ai i lalo o le Leipa le resitalaina o Pisinisi, Kamupani ma mea uma ave i ai mea uma tau pisinisi ia resitala ma faafoe mai lalo o Matagaluega a le Leipa.

O lona lua o tulaga tau le feagaiga faava o Malo, e lagolagoina e lou nei sui usufono faafetai, aemaise a le mea lea o le fiber plus. Sa o tatou talanoa ai foi i le Paeaiga ua tuanai. O se auala ina ia mafai ai ona faafaigofie le aumaiga i totonu o oloa e leai ni tiute, tusa e oti tatou i le tiute ae pei e mai a sau i fafo ina ia o foi, a o le taimi lenei se i tulou le Maota lenei e le o tele se tatou export. E pei la o lea penefiti ia fai pisinisi ma i latou e sau le oloa i totonu ae le o lava le exports pe mafai ona toe iloilo ifo ma silasila le komiti, o le tulaga sa iai le taimi lena i le Paeaiga ua tuanai ina ia mafai ona faamalosi le sau leai ni oloa leai se tiute pe tiute mama foi sa complain ai foi le Minisita o Tiute ae ia mafai ona tutusa i le malosi ma le saosaoa o le alu o tatou exports. O lea e tatalo atu ai toe silasila i lena vaega.

O le tulaga mo mea ia o oloa ia e tatou e aumai mai fafo tulou, ta te tago atu i le isi eleni ua manaia ia tago atu o le eleni lololo a o upu Samoa o eleni mai fafo, pe le mafai ona toe silasila i ai le tatou Matagaluega ma le Komiti ina ia faafaigofie pei o lea talanoa i le ava ma le tulaga lea i le nonu a ua faaaoga e Saina ma e mai fafo tulou ia upu Samoa e taulia ai le... Ta te alu atu i Niu Sila peepee lololo ae ta te vaai atu e le o se peepee made in Samoa o le peepee made from China, tulou. Ae pei o le agaga lena ua faaaoga e la tagata ia silasila ifo le Komiti ma le Matagaluega e faaaogaina upu Samoa e taulia ai latou products i le tulaga lena e talosaga atu ai.

O le tulaga i le vaai foi a lenei Itumalo i le tulaga faavaitaimi e leai e le o na o tatou o tupu ai lea tulaga ua tupu a le faafitauli lena, o lo o tupu foi i Fiti ma ua tele o tatou tagata ae pau a le tatalo tuu pea le avanoa e o ai o tatou tagata, aua se i tulou, e leai se mea e galue ai pea iinei ae vaai atu e sau le tagata e le lelei se aoga sau 6 masina 2 taavale fai le fale a lea. Tigaina a le tagata lea e faigaluega iinei e faigaluega leai se mea maua i le tausaga atoa o le totogi maualalo, faaluaina le finagalo o le Taitai o lenei

Itu se i silasila ane ua taugata le soifuaga lea ua i ai si o tatou atunuu ia lea e tumau a le \$3. Pe le o silasila ane le Komiti ma lau afioga i le Minisita pe le mafai ona tuu i luga i le \$5 e fuafua ma le tulaga e i ai pepafaigaluega. Popoe ia o le sui lenei ile tulaga lea i le isi vaega lea sa i ai foi i le suiina o laisene pisinisi kamupani mai fafo lea sa i ai pe 5 loa tausaga e le umia a ua nofomau ma mea faapena. E le gata i lea se i tulou a le Maota lenei i tagatanuu ua avea ma tagatanuu o Samoa aua tei a le faalogo ua faatauto isi tagata mai fafo e toalima ua avea ma tagatanuu Samoa.

O le tatalo a lenei itumalo se i silasila ane i tulaga ia ua faamatuu i ai nofomau ma pemitā i tagata nei aua e alu alu lona uiga e i ai le taimi o i luma po o le a se finagalo o le Atua aua e nofomau loa ma sitiseni i Samoa o lona uiga ua iai nisi tulou i totonu o lenei Maota ona e o foi auaiga faamatai ma omai ai faapena a o le tatalo, se i silasila ane ia tau faafaigata ia tulaga lena. O le mea foi lena lea sa naunau a lenei sui usufono i le tulafono lea ua aveese ai le Minisita o le Matagaluega lea o Leipa i le fonotaga ua tuanai ona o le popolega lea i pemitā, pemitā lea omai ai fafo ia se i tulou ua oo a le babysitter ua aumai fafo a o le alu o le suisui e le faapea e faailogalanu a o le tulaga lena. A o fea o le a a o i ai o tatou tagata? Fea la o i ai o tatou tagata suisui? Fea la o i ai o tatou tagata nofofale la e fia maua le babysitter ua o uma a e aumai mai fafo? O le isi tulaga e le umi a nofo i inei le tagata lea, nofo ifo ma le teine Samoa te i a lea ua avea ma tagatanuu. Se i silasila ane le tulaga lea aemaise o lo o galulue faatasi le Ofisa o Matagaluega o Leipa ma le Matagaluega o le Palemia.

E pei o le tulaga lea e tau faafaigata e le faapea e fai atu e faailogalanu ae tau faafaigata le omai, e mafai a na omai e asiāsi a o le mea lea le umi a na faafaigaluega. E sao foi le afioga i le Sui Taitai o le Taitai o lenei Itu e omai omai a tuu i ai le galuega aua o le tele o le aufaipisinisi mai fafo o lea ua toe o e aumai o latou tau aiga faafaigaluega. E pei o le agaga lena, se i faafaigata atu lau afioga i le Fofoga Fetalai, pau lena o nai manaoga o lenei itumalo e lagolagoina ai e lenei itumalo ma tulaga le lipoti a le Komiti ae manuia lau afioga i le sui usufono mo Vaimauga 3, ia o ou mama na aua le tulai mai i le foe o lena itu o le tatou Itumalo. Manuia le Fonousu a lo tatou atunuu.

**FOFOGA FETALAI:** Ia malo faafetai saunoa lau afioga i le sui usufono mamalu mai Vaimauga 1, e taua foi lou sao lea e faafogafoga mai le Komiti ma le Matagaluega aua lava le agai luma o le tautuaina o le atunuu, ua i ai le manatu lea ua maea saunoa le tatou Maota. Ia tulai mai lau afioga ile Taitaifono.

**Afioga NIUAVA ETI L. MALOLO:** Faafetai lau Afioga i le Fofoga Fetalai. E momoli foi le agaga faafetai i le Taitai o le Itu Agai e tusa ai o le tulaga e pei ona i ai le saunoaga matagofie faapea foi le sui usufono mo

Vaimauga 1. Faafetai mo fautuaga e matau ma le totoa lau afioga i le Fofoga Fetalai e pei e agai le saunoaga a afioga nei i fautuaga e faamatagofie atili ai le faamoemoe e pei ona i ai le lipoti a le Komiti, ona manatua lea e momoli le agaga faafetai i lau afioga i le Taitai o le Itu Agai mo fautuaga matagofie aemaise foi o le faatupu lagona lelei aua foi le faafofoga maua mai le Matagaluega aemaise foi o lea faafofoga atu le Komiti i fautuaga e ese le matagofie o lenei aso i la'u ia faalogo i lo'u tino aumai o fautuaga e sutfi ai le lagona ina ia tupu ma ola le lagona o le Matagaluega. Ese le agaga faafetai Viia le Alii lau afioga i le Fofoga Fetalai e tele vaega o le faafesili masalo e leai ni fesili na o fautuaga lea na aumai mai sui usufono mamalu, ua ou manatu o le a le oo foi i ai se... o lea ua faamauina fautuaga aemaise foi o le saunoga mai le sui usufono mamalu mai Vaimauga 1. E manatu o le le oo i ai o se tala ona o le tele o isi issue lea e talanoa ai le sui usufono mamalu o current issue e le o totonu o le lipoti ae momoli tele le agaga faafetai lau afioga i le Taitai o le Itu Agai aemaise foi lau afioga i le sui usufono mamalu mai Vaimauga o oe foi o le sui usufono matua ulusina o le Palemene. Faafetai mo fautuaga ia iai pea le manuia ole Atua i lua afioga aua foi le tausiga o le mamalu o le Palemene. O sa matou tu atu lea ma le agaga faaaloalo lau afioga i le Fofoga Fetalai aua foi saunoaga e pei ona pau i le Maota ma lou faaaloalo tele.

**FOFOGA FETALAI:** Malo saunoa i lau afioga i le Taitaifono atonu o lea foi ua faamauina fautuaga taua ia ma fautuaga sa saunoa i ai lea itu o le Maota, malo faafetai. Lau afioga i le Minisita ia o sau faaopopoga lau afioga i le Sui Minisita o Pisinisi, Alamanuia ma Leipa, tulai mai lau afioga

**Afioga Hon TOEOLESULUSULU CEDRIC POSE SALESA SCHUSTER:** Faafetai lau afioga i le Fofoga Fetalai mo le avanoa, na ona fono faapipii foi i le saunoaga a le Taitaifono ona o le tele o fautuaga ma nisi foi o vaega ua laga e nisi o saunoaga, o vaega o lea e silasila i ai le Matagaluega. Aua e pei ona silafia o le tele a o ia vaega e pei ona i ai foi i tali a le Matagaluega e le gata i tausaga ua tuanai a o lo o faagasolo ia galuega e faalelei ai vaega faapea i fautuaga. O le a toe galulue pea i ai le Matagaluega ia faaleleia ia sau le isi lipoti ua tali mai a outou fesili.

**FOFOGA FETALAI:** Ia malo faafetai, malo saunoa lau afioga i le Sui Minisita, o lea ua maea felafolafoaiga i le lipoti a le komiti ma o lea foi ua tou faafofoga i tali a lo tatou Malo. Ma e ui lava i tausaga ua tuanai, ua tele lava le taua mo lenei foi vaitau a o faagasolo pea galuega a le tatou Matagaluega eseese, ma o le mea lea ou te tapa lau afioga i le Taitaifono o le Komiti mo lau saunoaga.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le P.P 2022/2023 Nu 03 Lipoti a le Komiti o le Vaega Tau Tamaoaiga i le P.P. 2020/2021 Nu 64 Lipoti Faaletausaga a le Matagaluega o Pisinisi Alamanuia ma Leipa mo le Tausaga Faaletupe 2019/2020.*

Ma lo'u faaaloalo.

*Faaluuaina e le sui usufono mamalu mai Salega 1.*

*Na faamaonia le lafo.*

**FOFOGA FETALAI:** Ou te tapa lau Afioga i le Sui Minisita o Pisinisi Alamanuia ma Leipa.

**Afioga Hon TOEOLESULUSULU CEDRIC POSE SALESA SCHUSTER (Sui Minisita o Alamanuia ma Leipa):** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Tali a le Malo i fautuaga a le Komiti o le Vaega Tau le Tamaoaiga e pei ona ou tolaulauina.*

*Faalua e le Minisita mo Fesootaiga ma Faamatalaga Vavave Faaneionapo.*

*Na faamaonia le lafo.*

**P.P.2022/2023. NU. 10, LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU. 109 MA LE le P.P. 2021/2022 NU. 38, LIPOTI FAALETAUSAGA A LE MATAGALUEGA O FAALAPOTOPOTOGA A LE MALO MO LE TAUSAGA FAALETUPE 2020/2021.**

**P.P.2022/2023 NU.60 TALI A LE MALO I LE P.P.2022/2023 NU.10, LIPOTI A LE KOMITI O TUPE MAUA MA TUPE TOTOGI I LE P.P. 2020/2021 NU.109 MA LE P.P.2021/2022 NU.38. LIPOTI FAALETAUSAGA A LE MATAGALUEGA O FAALAPOTOPOTOGA A LE MALO MO TAUSAGA FAALETUPE 2019/2020 MA LE 2020/2021. ILOILOGA.**

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Lipoti a le Komiti o Tupe Maua ma Tupe Totogi, o loo tuuina atu ai ana Sailiiliga, Fautuaga ma Iugafono.*

*Faaluaina e le sui usufono mamalu mai Safata 2 faapea foi le sui usufono mo Aana Alofi 1.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Ma le faaaloalo lava ou te tulai atu ai lau Afioga i le Fofoga Fetalai i lenei avanoa e faafeiloai atu ai foi ma faamalo le soifua laulelei i le afio mai o lau Afioga i le Taitai o le Malo, Afioga i le Tamaitai Palemia, afifio o Minisita o le Kapeneta, le afifio foi o Afioga i Minisita Lagolago.

Liliu ane le la itu i le Taitai o le Itu Agai ae a Sui Usufono Mamalu uma o le tatou Palemene. E le faaitiitia foi le faafetai ma le faafeiloai i sui usufono ua tatou feiloai foi i le sui usufono mo Vaimauga malo faafetai. I lenei avanoa o lea ou oo ae loa i le tulaga e pei ona taua i tatou faagasologa o tatou galuega i le sailiiliga ale Komiti o Tupe Maua ma Tupe Totogi ua oo mai ai i galuega ausia o matatia ausia 2019/2020 iloiloga a le Komiti e 25 Faalapotopotoga a le Malo sa taliaina e le Kapeneta ia fautuaga e toe iloilo ai le faatulagaina o latou sui faatonu mo le aofaiga o Faalapotopotoga e 28 ina ia faamautinoa le agavaa o sui faatonu o lo o talafeagai ma o latou tiute ma matafaioi o lo o faatinoina. Siitia le tulaga o le usitaia o aso faatulafonoina mo le tuuina mai o lipoti a le Faalapotopotoga pe a faatusatusa i tausaga ua tuanai, faatinoina o galuega faigapaaga e aofia ai galuega i le 5 tausaga mo galuega i luga o le uafu mo pulega o uafu ma taulaga a Samoa, i lalo o le iloiloga a le Komiti i nisi o Mataupu e pei ona faamaonia, e faataatia ai se auivi mo faamoemoega mo le isi 2 i le 3 tausaga o lumanai. Toe suia o faamatalaga o sini autu i le avea o se maliega i le va o Matagaluega o lo o umia share faapea Komiti Faatonu o Faalapotopotoga, fausia taiala mo le puleaina lelei o tulaga tau tupe aua le siitia o faatinoga faiga faavae mo tufatufaga mai tupe faasili po o dividend, policy ma pasene o tupe faasili e maua mai i tupe faavae a le Malo. Iloiloga o lafoga tau o oloa ma tupe faasili ma Faalapotopotoga tau fefaatauaiga

manino le mafuaaga o le agavaa ma le le agavaa ai o Faalapotopotoga i le totogiina o lafoga o tau o oloa.

Faatulagaina o Faalapotopotoga o fefaatauaiga o Faalapotopotoga tau tautua ma Faalapotopotoga tau faamanuiaga a Samoa.

I le SIFA, Faalapotopotoga faamanuiaga e avea ma Faalapotopotoga tau fefaatauaiga. O le LTA, ua suia mai i Faalapotopotoga tau Fefaatauaiga e avea ma Faalapotopotoga tau Faamanuiaga. O le Gambling Control Authority, ua suia mai i Faalapotopotoga tau Fefaatauaiga e avea ma Faalapotopotoga tau Faamanuiaga. Ma le ACC, ua suia mai i Faalapotopotoga tau Tautua e avea ma Faalapotopotoga tau Faamanuiaga.

O nisi mataupu na laga, faamaoniga e pei ona taua, na autasi lea vaega o lo o i ai faaputugaoa a le aufai saofaga, ae maliu lava e le i faamanuiaina lava mai i lea vaega. E pei o le tulaga lea o le tatou vaega lea e tele lava ina fai ia le latou... ae oo lava ina maliliu e le i maua ia ni latou saofaga.

O le talitonuga o le Komiti, o la lava sa sao lava ia le tautua sa i ai muamua na i lo le toe faatulagaina lea ua toe faia nei. O le faamaninoga mai i Matagaluega, e ese le anavatau o lo o fausia ai lea itu o le atinae. O le ACC e le pei o le NPF ma le SLAC e mafai ona faamanuiaina ai le aufai saofaga seivagana ua tupu se faalavelave ia te oe o le tagata fai saofaga a o i luga o galuega, peitai, e pei o le liliga o le taofi ua afua ai ona toe fetuunai mai ia le Faalapotopotoga tautua e avea ma Faalapotopotoga tau faamanuiaga ona ua aafia i faalavelave lea e mafai ai loa ona faamanuiaina le tagata fai saofaga mai i lana faaputugatupe lea i le ACC po o le Accident Compensation Board. Na mafai ona maua le malamalamaaga o le Komiti i ni pepa na tuuina mai e le Matagaluega faapii i fautuaga a le Komiti.

### **Fautuaga 1 i le Matagaluega o Faalapotopotoga a le Malo:**

**Ia toe iloilo ia sea po o vaegatupe o totogi atu e Faalapotopotoga Tuumaoti a le Malo i luga o Tupe Faavae mo atinae a Faalapotopotoga ona o aafiaga a le Koviti-19.**

### **Fautuaga 2:**

**E fautuaina e le Komiti ia le Matagaluega ina ia toe iloilo le mafuaaga na toe fetuunai ai ia le ACC ma le Gambling Games Authority, e faasee atu i Faalapotopotoga tau Faamanuiaga pe a fua i a latou tupe maua mai i tausaga taitasi aemaise tupe faafaigaluega Investments.**

### **Fautuaga 3:**

**E fautuaina e le Komiti ia le Matagaluega o Faalapotopotoga a le Malo, e faamanino le fetuunaiga o le faaaogaina o upu e aofia ai le avea o Minisita o tulai mai i tulaga tofi e fai ma sui a le au faisea po o shareholders mo le Faalapotopotoga ma Komiti Faatonu.**



#### **Fautuaga 4:**

**E fautuaina e le Komiti le Matagaluega se i toe silasila i le mafuaaga ua faatapulaaina ai le aufaigaluega pe a fuafua i a latou galuega faatino ua faatupulaia ai le aufaigaluega e faasao ai tupe a le Malo.**

Ia o le maea ai o le iloiloga a le Komiti e fautuaina le Fono Aoao ina ia faamaonia Pepa a le Palemene 2020/2021 Nu.109, Lipoti Faaletausaga 2019/2022 a le Matagaluega o Faalapotopotoga a le Malo Tausaga Faaletupe faaiiua ia Iuni 2020. P.P. Nu.38, Lipoti Faaletausaga 2020/2021 a le Faalapotopotoga a le Malo mo le Tausaga Faaletupe e faaiiua ia Iuni 2021. Ma le faaaloalo lava i lau afioga.

**FOFOGA FETALAI:** Malo, faafetai saunoa i lau afioga i le Taitaifono mo le tolaulauina o sailiiliga ma fautuaga aemaise foi o iugafono a la outou Komiti. Malo le galulue.

Ia, ou te tapa lau afioga i le Sui Minisita o le Matagaluega o Faalapotopotoga a le Malo mo le tolaulauina o Tali a le Malo i fautuaga a le Komiti e pei ona tolaulauina nei e le afioga i le Taitaifono.

Tulai mai lau afioga Honorable Toeolesulusulu.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai, ou te tolaulauina Tali a le Malo, e faatatau i fautuaga a le Komiti o Tupe Maua ma Tupe Totogi, e pei ona folasia manino nei e le Taitaifono.

Lau afioga i le Fofoga Fetalai, Lipoti a le Komiti o Tupe Maua ma Tupe Totogi mo le P.P.2020/2021 Nu.109, Lipoti Faaletausaga a le Faalapotopotoga a le Malo 2020, ma le P.P.2021/2022 Nu.38, Lipoti Faaletausaga a le Matagaluega o Faalapotopotoga a le Malo 2020/2021.

#### **Fautuaga 1:**

**E fautuaina e le Komiti ia le Matagaluega o Faalapotopotoga a le Malo (MPE) ina ia toe Iloilo Sea po o vaegatupe faasili o lo o totogi atu e Faalapotopotoga Tumaoti a le Malo fuafua i luga o Tupe Faavae mo atinae a Faalapotopotoga ona o aafiaga o le Koviti-19.**

#### **Tali a le Malo**

O aafiaga o le Koviti-19 i galuega faatino faapea taunuuga o galuega a Faalapotopotoga tau feafaatauaiga (FTF), ua matauina ai le aafia o le tulaga o le totogiina mai tufatufaga o tupe faasili. I le faiga faavae o lo o i ai i le taimi i tufatufaga o tupe faasili, a faamauina tupe gau a le FTF i le faaiuga o le tausaga faaletupe, e le agavaa i le totogiina mai o tufatufaga o tupe faasili. A ausia tupe faasili (profit) e ao ona toe iloilo e le FTF le mafai ai ona totogiina mai tufatufaga o tupe faasili i le Malo e fua i faagasologa o

tupe faapea le totogiina o aitalafu (cashflow and solvency). A faapea e le mafai ona totogiina mai tufatufaga o tupe faasili ae o lo o ausia tupe faasili (profit), e tatau i le FTF ona tuuina mai ni faamatalaga/tusitusiga i le MPE o mafuaaga e le mafai ai ona totogiina i le Malo tufatufaga o tupe faasili.

E tusa ai ma Faamatalga po o Tala o Tupe FTF i tausaga na aafia ai Samoa ma le lalolagi i le Koviti-19 (2020-2021 & 2021-2022) ua matau ai e le i aafia uma FTF I le Koviti-19. E tusa ma le 9/15 FTF na ausia tupe faasili i le 2020-2021 faapea foi le tausaga faaletupe 2021-2022 i le maea ai ona toe fetuunai le faatulagaina o le GCA ma le LTA e avea ma Faalapotopotoga o faamanuiaga a le Malo po o le beneficial body.

O FTF na ausia tupe gau e le i totogiina mai se tufatufaga i le Malo. O lo o feutagai lava le MPE ma tatou FTF o lo o faamauina tupe faasili mo le fuafuaina o tufatufaga e fua i le tulaga o tupe o lo o i ai nei.

E oo mai nei i le aso e le i taulimaina e le Matagaluega se faamatalaga po o se tusitusiga e faamatala mai ai le le mafai ona totogiina mai le tufatufaga o tupe faasili mai FTF ua faamauina tupe faasili ma tatau ona totogiina mai tufatufaga mai le Malo e tusa o Faiga Faavae.

E le o moomia se toe Iloilo o le Faiga Faavae ona o lo o mafai lava ona tali atu le Faiga Faavae o lo o i ai i le taimi nei vaega uma o lo o aafia taunuuga o galuega e mafua mai i le Koviti-19.

### **Fautuaga 2:**

**E fautuaina e le Komiti ia le Matagaluega ina ia toe Iloilo le mafuaaga na toe fetuunai ai le ACC ma le GCA e faasee atu i le Faalapotopotoga Tau Faamanuiaga pe a fua ia latou tupe maua mai tausaga taitasi, aemaise tupe faafaigaluega (investments).**

### **Tali a le Malo**

O le iloiloga mo le faavasegaina o Faalapotopotoga a le Malo sa faatinoina e lenei Matagaluega faatasi ai ma le lagolago a le Konesale mai le Faletupe o Atinae o Asia (ADB). I lona aotelega, e fitu (7) ni vaega taua sa faaaogaina e faavasegaina o Faalapotopotoga. O nei vaega taua e aofia ai;

- i. ***Sini Autu*** (O faatulagaina Faalapotopotoga e tai tutusa faiga faavae (jurisdiction) i lalo o faalapotopotoga e fefaatauai mo se tupe mama pe e i lalo o faalapotopotoga e le fefaatauai mo se tupe mama)
- ii. ***Alagatupe maua***(tupe maua a se faalapotopotoga e afua mai i auaunaga e totogi e tagata (user pays po’o le tele o le tupe).
- iii. Faalapotopotoga o i ai ni matafaioi tau pule faatonu (***regulatory***), fausiaina Faiga Faavae, po o pulega faaletulafono (***semi-judicial body***).
- iv. Pe o lo o resitala le Faalapotopotoga o se ***Kamupani i lalo o le Tulafono o Kamupani 2001***.

- v. *Sini autu mo Faalapotopotoga o lo o faamatalaina i le Tulafono o Faalapotopotoga 2001* e pito sili ona talafeagai.
- vi. Vaevaega (Ratio) o le totogiina o tupe ma ni faamanuiaga e ono maua mai ai (Payments: Expected Financial benefits)
- vii. *Faatulagana aupito talafeagai mo le umiaina*, e lagolagoina ai le sini autu o Faalapotopotoga o lo o i lalo o le Tulafono Faalapotopotoga 2001.

I le maea ai o le iloiloga o tulaga e 7 ua taua i luga i le faavasegaina o Faalapotopotoga o le Malo, ua faasee mai ai le Faalapotopotoga/Pulega Tau Petipetiga e avea ma Faalapotopotoga Faamanuiaga a le Malo (Public Beneficiary Body) ona o le matafaioi o le faatonutonu (regulatory) o taaloga tau petipetiga. E le o i ai foi se sini autu a le GCA e faatonutonu taaloga nei mo se tupe faasili e maua mai i a latou galuega. O le GCA foi e le o lesitalaina o se Kamupani i lalo o le Tulafono mo Kamupani 1955. O matafaioi uma a le GCA i lalo o lona Tulafono e talafeagai ma talafeagai lelei ma le Vaega 14 o le Tulafono mo Faalapotopotoga a le Malo 2001.

Sa toe faatulagaina le ACC o se Faalapotopotoga Tau Faamanuiaga e tusa ai ma le vaega e 6 o lo o taua i luga. E le o i ai se fesootaiga o saofaga a tagata ma faamanuiaga tau tupe e ono maua mai pe a tupu se faalavelave. O saofaga o lo o faavaeina i le Tulafono, ae o le fai saofaga e tele le avanoa e le agavaa ai i se faamanuiaga pe a le lavea i se faalavelave. E le pei o Faalapotopotoga Soosoo Tauau e pei o le SNPF ma le SLAC, e fua le tele o le tupe faasili (dividend) e toe totogiina atu i le fai saofaga ma le fai inisiua, i le aofai o lau saofaga po o lau inisiua o lo o totogiina (contribution/premium). E alagatau ai ona toe faatulaga le ACC i lalo o Faalapotopotoga o Faamanuiaga a le Malo ma e ogatusa lea faiga ma faiga faavae a le ACC i Niu Sila (Crown Entity).

### **Fautuaga 3:**

**E fautuaina e le Komiti le Matagaluega o Faalapotopotoga a le Malo e faamanino le feteenaiga o le faaaogaina o upu e aofia ai le avea o Minisita o lo o tulai mai tulaga tofi e fai ma sui o le aufaisea (shareholder) mo le Faalapotopotoga ma le Komiti Faatonu.**

### **Tali a le Malo**

Ua pasiaina e le Kapeneta ia Mati 2022 se Iloiloga o Tulafono uma o lo o aiaia ai galuega mo Faalapotopotoga uma a le Malo. O lenei galuega tele ua fuafuaina ina ia faamanino ai matafaioi o Minisita e umia sea, Minisita e fitoitonu i Faalapotopotoga a le Malo ma isi Minisita o le Kapeneta.

Ua maea ona feutagai le Matagaluega, Matagaluega o Tupe ma le Faletupe o Atinae o Asia, mo se fesoasoani faapitoa e faatino ai lenei

galuega. E faamoemoe o le a amatalia lenei iloiloga i totonu o le 6 masina muamua o le Tausaga Faaletupe 2022/2023.

**Fautuaga 4:**

**E fautuaina e le Komiti le Matagaluega se i toe silasila i le mafuaaga ua faatupulaia ai le aufaigaluega, pe a fuafua ia latou galuega faatino, e faasoa mai ai tupe a le Malo.**

**Tali a le Malo**

O tagata faigaluega o le MPE e fua lava i galuega faale-Tulafono e moomia ona faatinoina. E iloilo ina faatasi lava taunuuga o galuega ma aseta moomia e faaleleia ai galuega e pei o le moomiaga o tagata faigaluega mo le Matagaluega i tausaga taitasi.

Mai ia Aperila 2015 ina ua faatuina le MPE, e valu (8) ni avanoa na faaopoopoina i le faavaa o le aufaigaluega. O nei avanoa uma e 8 e mo le Vaega o Auaunaga Lautele ona sa ave ia le faamuamua i le faatotogaina o le aufaigaluega i le Pulega ma le vaega faapitoa o auaunaga faatino. O lo o sosolo lava foi lenei iloiloga i faiga faavae ua faataatia e le Komisi o Galuega ma le Matagaluega o Tupe.

O se tali maoti lea lau afioga i le Fofoga Fetalai, mai i le Matagaluega ma le tatou Malo, faafetai.

**FOFOGA FETALAI:** Malo, faafetai. Faafetai i lau afioga i le Sui Minisita. E ui lava o lau afioga o lo o tulai mai i lenei taimi Sui Minisita, ia ae o lo o manino lava ia Tali a le tatou Malo, ia e tusa foi o fautuaga a le tatou Komiti. O le mea lea malo galue faafetai.

Ia o lea ua faafofoga maua ia le tatou Maota i le Lipoti a le Komiti e pei ona tolaulauina e le afioga i le Taitaifono, ia faapea foi Tali a le Malo i fautuaga a le Komiti e pei ona tolaulauina e le Afioaga a le Minisita.

Ia o le avanoa lenei mo se sui usufono e fia saunoa i le Lipoti a le Komiti, 15 minute ma le faaaloalo. Ia lea ua matau atu lea ua tulai mai le Afioaga i le Taitai o le Itu Agai. O le avanoa lenei i lau afioga...

**Tofa Hon LAUOFO FONOTOE NUA FESILI PEIRRE LAUOFO:** Faafetai i lau afioga i le Fofoga Fetalai. E faamauiina le faafetai i le afioga i le Taitaifono o le Komiti ma lana Komiti aua lenei lipoti. E momoli foi le faafetai i le Afioaga i le Minisita i Tali a le Malo. E tulai atu e faamauiina le faafetai a lenei itumalo i le tatou Matagaluega po o le tatou Malo e ana le lipoti.

O lea ou te matau atu 2019/2020 maua tupe faasili, profit \$3,731,114. Tausaga 2020/2021 maua tupe faasili profit, \$16,683,835. E faamalo i afioga i Minisita ma le Matagaluega mo le monitor ina o tatou Public Training Bodies nei. Ia faapena ona faaauau pea ia galuega lelei. O lea ua

toe recover mai tatou i aafiaga o le Koviti lea sa aafia ai nisi o tatou Faalapotopotoga Tumaoti. O lea e matau atu e pei e 9, 9 Faalapotopotoga Tumaoti, 2, 4, 6, 6 ia Faalapotopotoga Tumaoti na aafia tele i le Koviti ma le maua ai ia se latou tupe faasili.

O le Faletupe o Atinae, ia o lea e malamalama i tulaga e i ai ona o le Faletupe o Atinae na faatupeina ia le tele o faletalimalo, o faletalimalo na aafia tele i le Koviti. E pei ona silafia sa tapunia ia tatou borders leai ni femalagaiga, leai ni malo, leai se tupe e totogi ai nonogatupe a faletalimalo i le Faletupe o Atinae.

Ia e faapena foi ia le tatou vaalele, leai se vaa a le Kamupani Vaalele leai se vaalele na feleleai, leai se tupe maua ia tele le faaletonu. Ia faapea foi ia le Pulega o le Malaevaalele, leai ni vaalele e tu laueleele, e pei o i lea e maua ai ia le latou tupe tele, ia ua faaletonu foi ia latou. Ia faapea foi ia le tatou SSS, ona o tatou seila o lo o galulue i luga o meli laupasese, na faapena ona faaletonu i taimi o le Koviti, ia ma faaletonu ai foi ma Tupe Maua.

Ia o le tulaga lea lau afioga i le Fofoga Fetalai e pei e matau atu ia o le 3 tausaga na ua tuanai atu, ae e pei o le taimi lenei, ia o lea ua toe siitia le tulaga e i ai, ua solosolo lelei mea uma.

Ia o le matou faamatalaga lea ma le faaloalo lau afioga, e faamauina ai ia le matou faafetai i le Matagaluega e ou le Lipoti.

**FOFOGA FETALAI:** Malo, faafetai, malo saunoa i lau afioga i le Taitai o le Itu Agai ia mo le faamalosiua foi ia aua le faagasologa o le agai i luma o le tatou Faalapotopotoga.

Ia o lea ua matau atu ua fou mai le sa o le sui usufono o Falelatai ma Samatau. Ia tulai mai ia le sui usufono mamalu.

**Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau):** E momoli atu le agaga faafetai tele i lau afioga i le Fofoga Fetalai, mo le avanoa o lenei itumalo o Falelatai ma Samatau, e fai ai se sao e tusa o le Lipoti a le Komiti.

Ia e avea foi lenei taimi e avatu ai le faamalo ma le faafetai faatasi ai foi ma faamanuiaga i le tulai mai o le sui usufono sa faatautoina i le taeao ua sola, lau afioga Lautimuia Ueese Vaai. O lau afioga foi ua loa tausaga o tautua i le tatou Malo, ia sagai ane ai o le tai, e fai foi sou sao i upufai ole atunuu ma fesoasoani i le atinaeina o le tatou Malo i lenei foi vaiata.

Ae e puupuu lava se manatu o lenei itumalo lau afioga i le Fofoga Fetalai. E molimoli atu le agaga o le faafetai tele i le Afioga i le Taitaifono ma le Komiti, faapea foi le afioga i le Minisita aemaise o le aufaigaluega ma le Matagaluega, i le taumafaiga foi o le galuega ma le Matagaluega.

Ae e pau lava nai tuualalo e tuu atu i autafa o le afioga i le Minisita ma le tatou Matagaluega, e matau e ese foi le taua o le mafuaaga sa faatu ai e le

tatou Malo ia le Matagaluega lenei o le MPE, e nafa ma le mataituina o galuega a Faalapotopotoga Tumaoti. E pei foi ona silafia e tasi lea o vaega o le atinaeina o le tatou atunuu aemaise o le Malo, o le aveese o nisi o Faalapotopotoga mai i Matagaluega, ae avea ma Faalapotopotoga Tumaoti. O le manatu maualuga sa i ai foi i lena vaitau, ina ia mafai ona tulai mai ia Faalapotopotoga Tumaoti nei, i se tulaga ia aua ne i toe faalagolago i le Malo mo tupe maua e faatino ai a latou galuega. Ia aemaise ia tulai mai ia avea ma ni Faalapotopotoga e galuega faapisinisi ina ia maua mai ni polofiti po o ni tupe faaalu e fesoasoani e faatupe ai Paketi a le tatou Malo.

Ae e i ai nai vaega taua nei e pei ona maua atu i la matou faalogologo, faafetai o lea ua i ai le galuega lea ua fuafua e fai i ai. O le feteenaiga lava i nisi o taimi, e le o iloa tonu po o ai le responsible Minister ma le Shareholding Minister. E pei o nai tulaga ia e tau feteenai i nisi o taimi aemaise o le faatulai mai o le Taitaifono ma le Komiti Faatonu, e pei o latou lea ua tuu atu i ai le faatuatuaga o le Malo, ina ia nafa i latou ma le faatinoina ma le galueina o Faalapotopotoga ina ia ausisa le Sini Autu lea e faamoemoe i ai le Malo. Aepeitai o nisi o taimi e matau, e tau i ai lava ia le feteenaiga lea aua o lea ou te matau, na ala ona faatulaiese le Minisita mai i le Taitaifono o le Komiti Faatonu, ina ia mafai ona leai se political influence i le faafoeina o le Corporation po o le Faalapotopotoga Tumaoti.

O lea foi ua maea ona saina le Taitaifono ma Sui o Komiti o Faalapotopotoga Tumaoti, e responsible latou pe a i ai se faaletonu e tulai mai i le Faalapotopotoga. Ae e pei o nai vala ia e avatu ai pea ia le fautuaga i le Malo. O nisi foi o taimi e naunau mai le Taitaifono ma le Komiti Faatonu e faatautai ma faatino lo latou valaauina, ina ia mafai ona ausia sini autu e pei ona tuuina mai e le Matagaluega o le MPE. Ae e pei o nai vaega na e le o iloga ona manino mai i lenei taimi aua a faaletonu le Faalapotopotoga, o lea ou te malamalama e sei aseta, ma oo foi i le Tulafono ia le Taitaifono ma le Komiti Faatonu.

Ae afai o i ai se tulaga e feteenai ai le Komiti Faatonu ma le Minisita ma le Faigamalo, ia ona i ai lea o se lavelave ma ni tulaga e tulai mai. Ae o le fautuaga lava e tuuina atu, ia manino lava le faatinoina o galuega a le Taitaifono ma le Komiti Faatonu faapea foi ma le Pulega, o le galulue faatasi ia ausia le sini autu lea e naunau ai le Malo, ia tulai mai e avea ma Faalapotopotoga malosi, e le o se beneficiary body e pei ona matauina e isi Faalapotopotoga ia ua toe faafoi, ae o latou o lo o i ai le agaga o le Malo, e tulai mai i se tulaga lelei e tatau ona i ai e pei o se pisinisi.

Ma o vaega taua foi ia o lea e agai i ai le atinaeina o le tatou atunuu. A maea ona avea se Faalapotopotoga ma Corporation, o le isi stage e ono oo i ai, o le avea ma Private Sector. Ioe, o le agaga maualuga ia mafai ona siitia le auaunaga, siitia le efficiency, siitia le polofiti, aemaise lava le auaunaga i le atunuu lautele. E moni lava o lo o i ai le matafaioi a le Malo, pe a silasila atu e manaomia se faamama avega a le Malo o le mamalu o le

atunuu, o le Malo o le shareholder o le Faalapotopotoga. In fact o le 100% o le shareholder. So o lo o i ai lava le avanoa e ave ai le tuualalo a le Malo i le Taitaifono ma le Komiti Faatonu, ae o latou lava ua nafa ma le faatinoina o le galuega.

E pei o se tuualalo lea e avatu i le tatou Malo ia maua le agaga e mafai ona galulue faatasi, galulue faatasi le Minisita, Taitaifono ma le Komiti Faafoe, ina ia taunuu lava ia le miti lea. Ia aua a faapea nei ua ese se direction ua o tatou o ai i lenei vaitaimi ua le faatinoina ia le avea o Corporations i le mea sa taumafai mai ai, o lona uiga ua fesiligia foi, pe tatau ona toei ai ia le Matagaluega lea o le MPE. Ma o lea foi e tele ia tupe a lo tatou Malo lea e faatupe ai ia lea Matagaluega taua a le Malo, ae afai la ua le mulimulitai i Faiga Faavae i tulaga sa faataatitia mai ai, o lona uiga la ua tatau foi la ona toe silasila i le tulaga o i ai le Matagaluega lea, po o agavaa ona toe faaauau pe leai.

E pei o se fautuaga lea e tuu atu i lau Afioga i le Taitai o le Malo, faapea foi afioga i Minisita o le Kapeneta, ina ia mafai ona tulai mai a tatou Faalapotopotoga, e tele foi o latou sao mo le faatupeina o le paketi a lo tatou Malo, aemaise foi ia siitia le auunaga i le mamalu o le tatou atunuu.

E na o le pau ia o nai fautuaga e tuuina atu i le Taitai o le Malo ma le Kapeneta. Ia manuia tele toe taimi o totoe o le tatou Fonotaga i lenei aso. Faafetai.

**FOFOGA FETALAI:** Malo saunoa i lau afioga i le sui usufono mamalu, aemaise foi o le faufautua foi aua le agai i luma, aua foi lea Faalapotopotoga taua a lo tatou Malo, malo saunoa.

O le avanoa lenei i se tasi o sui usufono. O lea e matau atu e leai se isi o le Maota. Lau afioga i le Taitaifono, o lea ua e faafofoga mai i fautuaga mo se saunoaga a lau afioga i le Taitaifono.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai, faafetai mo le avanoa. E le toe i ai se faamatalaga e toe sili, o lena ua aumai fautuaga i le Taitai o le Itu Agai, faapea foi le sui usufono mamalu. E momoli atu le faamalo mo fautuaga ma tuualalo mo se lelei o le tatou Matagaluega, e momoli atu ai le faamalo ma le faafetai. E ioe foi ma talitonu, e so o se tuualalo lava e lelei, ia o le a faaaloalo, ma le agaga faaaloalo. E ioe ma talitonu, e pau lea o le tali atu i le tele o vaega ua tuualalo mai ai lau Susuga i le Taitai, faapea foi le tuualalo a lau Afioga Lupematasila. Malo faafetai.

**FOFOGA FETALAI:** Lau afioga i le Sui Minisita pe i ai se mea o e fia saunoa ai. Ia malie lava...

Tulai mai lau Afioga i le Minisita o Galuega, Felauaiga ma Atinae Esee.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese):** E faafetai atu i lau afioga mo le avanoa. Ona o lea e faalogologo atu lava ma le totoa o lo o i ai le tulaga aafia foi o lenei itu, i nisi foi o manatu ma finagalo. I le tulaga lava ia lea sa faaalua ai le me'i mai o nisi o Pulega e lua, aemaise le Pulega a le LTA i le Public Beneficial Body i le 3 tausaga talu ai. Atonu foi o la sa i ai le tulaga foi lea, silasila foi le Faigamalo talu ai i le tulaga o le faatinoina o matafaioi tauave a lo tatou Pulega o le LTA. O le tatou Pulega lea, e 12 masina e fai ai le latou budget mo galuega. Peitai a matau foi e lau afioga ma le mamalu o le tatou Palemene nei, o le Pulega lea, o le tele o taimi, aemaise lava pe a faaletonu mai le tau, e i ai lava le tulaga o galuega faafuasei, unforeseen. E faapena foi ona i ai ia galuega e faaauau pea, e oo foi lava i le tulaga o le faaleleia o auala po o maintenance o auala, ia e le talanoa ia le Pulega ma le tulaga o le faaleagaina. E pei o le vaega lena na i ai se manatu o le Faigamalo talu ai, e aumai i i, le vaega lea o le LTA, e aunoa ma se totogiina o se dividend, atonu o le mea lena. Ma le isi foi mea, atonu o le matafaioi tauave lava ia a le tatou Pulega, e na o national main roads, e le o i ai ni auala galue i totonu o le faatinoga o latou matafaioi. Ae ua i ai le tulaga lena, ua faasafua uma a latou seleni e fai ai ia galuega ia, pe a faapea lava e talosagaina e afioga i sui usufono po o itumalo.

O le tulaga lea i tatou komiti faafoe po o tatou boards, e faafetai tele atu lava i sui usufono mamalu sa laga le mataupu lea. Ua ou tali, ona o au lea e nafa nei ma le tatou komiti faafoe, e vaeatu le afioga i le Minisita o lo o tauaveina le tulaga lea. Ae pei e sili ai ona fai sau tala puupuu i le tulaga o komiti faafoe. E moni le saunoaga a le sui usufono, ua i ai tulaga o Tulafono ma faiga faavae e faatulafonoina ai le matafaioi a le komiti faafoe. Aepeitai lau afioga, o lea sa toe manino mai i lana saunoaga mulimuli, e 100% le shareholder a le Malo. Ma e le mafai ona tuufaua, vaeatu lau afioga ma le paia o le Maota se komiti faafoe, e le agai tonu i le tulaga e pei ona finagalo i ai le Malo. E leai, e le faapea e i ai se freedom e fai ai lava latou, ae le ogatasi ma le mea lea e finagalo i ai le faigamalo ma le Kapeneta.

E pei la o le tulaga lena lau afioga i le Fofoga Fetalai, ua ou tulai atu ai, e fai atu sina faamalamalamaaga puupuu, o la foi e faafogafoga mai afioga i Taitaifono ma komiti faatonu o lo o tauaveina galuega a lenei itu. Faafetai.

**FOFOGA FETALAI:** Faafetai saunoa i lau afioga i le Minisita e tusa foi i nisi o mataupu sa laga i saunoaga a sui usufono mamalu.

Lau afioga i le Sui Minisita mo le saunoaga.

**Afioga Hon Toolesulusulu Cedric Pose Salesa Schuster:** Faafetai i lau afioga i le Fofoga Fetalai, o lea ua saunoa le Taitaifono i le tele o vaega



aemaise o Fautuaga. Ou te talitonu e aoga mo le Matagaluega mo le alualu i luma.

E pau lava si vaega lea e fia oo i ai se leo lau afioga i le Fofoga Fetalai, e toe faamanatu atu e tusa foi o nisi o saunoaga, ia le Fautuaga lona 3 lea o lo o faatinoina nei e le Pulega o le MPE, o lo o i ai le consultant lea o lo o faatinoina nei le polokalame lea i le toe iloiloa o faavae ma vaega ia, atonu foi o tulaga i tausaga ua tuanai, ia toe mafai ona toe faalelei ai, e pei ona saunoa le Minisita, o le naunautaiga ina ia toe faaleleia le auaunaga, e le gata o komiti faatonu, o Pulega, faapea foi auaunaga a Minisita o lo o i ai i totonu o vaega ia. Ma e talitonu e le o toe mamao ona maua mai lea o se tali, aua le faaleleiga ma le alualu i luma o le tatou Pulega lau afioga. Faafetai.

**FOFOGA FETALAI:** Faafetai i le saunoaga a lau afioga i le Sui Minisita. O lea ua maea felafolafoaiga i le Lipoti a le Komiti ma le Tali a lo tatou Malo.

Ou te tapa lau afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoao le P.P.2022/2023 Nu 10, Lipoti o Tupe Maua ma Tupe Totogi i le P.P. 2020/2021 Nu.109 ma le P.P. 2021/2022 Nu 38, Lipoti Faaletausaga a le Matagaluega mo Faalapotopotoga a le Malo mo le Tausaga Faaletupe 2019/2020 & 2020/2021.*

*Faaluaina e le sui usufono mo Falealili 2 ma Aana Alofi Nu 1.*

*Na faamaonia le lafo.*

**FOFOGA FETALAI:** Ou te tapa lau afioga i le Sui Minisita mo Faalapotopotoga a le Malo.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao Tali a le Malo i Fautuaga a le Komiti o Tupe Maua ma Tupe Totogi e pei ona ou tolaulauina.*

*Faaluaina e le Minisita mo Fesootaiga ma Faamatalaga Tekonolosi ma le sui usufono mo Aana Alofi 1.*

*Na faamaonia le lafo.*

**P.P.2022/2023 Nu 11, LIPOTI A LE KOMITI O TUPE MAUA MA TUPE TOTOGI I LE P.P.2020/2021 Nu 106 & P.P.2021/2022 Nu 24, LIPOTI FAALETAUSAGA A LE FALETUPE TUTOTONU O SAMOA MO TAUSAGA FAALETUPE 2019/2020 & 2020/2021**

**P.P.2022/2023 Nu 61 TALI A LE MALO I LE P.P.2022/2023 Nu.11, LIPOTI A LE KOMITI O TUPE MAUA MA TUPE TOTOGI I LE P.P.2020/2021 Nu 106, MA LE P.P.2021/2022 Nu 24, LIPOTI FAALE-TAUSAGA A LE FALETUPE TUTOTONU O SAMOA MO TAUSAGA FAALE-TUPE 2019/2020 & 2020/2021 – ILOILOGA.**

**FOFOGA FETALAI:** Tulai mai lau afioga i le Taitaifono o le Komiti o Tupe Maua ma Tupe Totogi.

**Afioga FALEOMAVAEGA TITIMAEA TAFUA:** Lau Afioga i le Fofoga Fetalai, ou te faatu le lafo, *Ina ia faautagia e le Fono Aoao le Lipoti a le Komiti o Tupe Maua ma Tupe Totogi o lo o tuuina atu ai Sailiiliga, Fautuaga ma Iugafono.*

*Faaluaina e le sui usufono mo Safata 2.*

*Na faamaonia le lafo.*

**FOFOGA FETALAI:** Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga FALEOMAVAEGA TITIMAEA TAFUA:** Faafetai mo le avanoa i lau afioga i le Fofoga Fetalai. I sailiiliga a le Komiti i lona aotelega i faiga faavae tau tupe ma lona tamaoiga.

I le tausaga faaletupe 2019/2020 na faamauina ai le faaitiitia o le tamaoiga, ua le gata i Samoa nei, ae faapea foi le tamaoiga o le lalolagi, ma le maketi tau tupe, ona o aafiaga o faamai, ua pesia ai le lalolagi atoa. Ua aafia le tamaoiga o le lalolagi e tusa ma le 1% le pau i le fua faatatau i le tausaga faale-tupe 2018/2019. Ona o lenei tulaga ogaoga ma le maaleale ua afaina ai le vaega o tagata tafafao maimoa mai fafo po o turisi, ma ua avea ma se luitau tele i isi o vaega o le tamaoiga o le atunuu. Ona o le tulai mai o le faamai o le Koviti-19, sa faamauina ai le maualuga o tupe maua a le Faletupe Tutotonu o Samoa mai fesoasoani mai fafo, faapea ai se nonogatupe mai le Faalapotopotoga faava-o-Malo, ma mea tau tupe ma isi fesoasoani mai Faletupe o le Lalolagi, Faletupe o Atinae o Asia, o le Malo o Niu Sila ma Ausetalia, mo taumafaiga e tetee ai i faamai.

O lea sa siitia ai tupe o lo o faaleoleo i fafo, e tusa ma le \$106.2 miliona, o se faasiliga o paleni o tupe totogi, i se tau aofai e tusa ma le \$616.2

miliona, matatia maualuga i le tausaga faale-tupe 2019/2022, faatusatusa lea i le faasiliga sa fuafuaina e tusa ma le \$17.8 miliona.

I le tausaga faaletupe 2020/2021 sa matua aafia gaoioiga o le tamaoiga o le lalolagi, ona o le Koviti-19, semanu e sili atu le ogaoga o lea aafiaga, pe ana le seanoa le lagolago o fesoasoani tau tupe ma faalavelave faafuasei, sa faagaoioia ai le tufatufaina o tui puipuia i le afa mulimuli o le tausaga. Sa faamauina le tele o luitau i le vaega o tagata tafafao maimoa mai fafo ona o vavao o le faamai. Ma ua tapunia ai tuaoi faava-o-Malo mo femalagaaiga ma utiuti ai tupe maua mo le atinae o le atunuu.

O le tausaga faaletupe lenei 2020/2021 sa fuafuaina ai se pau maualalo mo se taimi muamua i le tamaoiga o Samoa e 8.1%, e ui o lenei fuafuaga ae sa faamauina foi le oo atu i le \$1.77 piliona o tupe faaagaaga e tusa lea o le 10.7 masina e mafai ona faatauina mai ai oloa mai fafo.

### **Fautuaga 1:**

**E fautuaina e le Komiti Faletupe Tutotonu o Samoa, Central Bank, ina ia faia ni auala e faamautinoa ai, o lo o sologa lelei le mataituina o nonogatupe a pisinisi o lo o aafia le tamaoiga ona o le Koviti-19, aemaise lava i faletalimalo ma le vaega o Tagata Tafafao Maimoa mai Fafo o lo o tele le a'afiaga ma le pagatia ona o le fa'ama'i.**

### **Fautuaga 2:**

**E fautuaina e le Komiti le Faletupe Tutotonu o Samoa, ina ia fa'aaau le toe fa'amatuuina atu o fa'amanuiaga (staff benefits) i tagata faigaluega a le Faletupe Tutotonu o Samoa ma ni aiaiga e fa'atapula'a ai talosaga, ina ia tu'uitiitia ai le fememea'i solo o le afaigaluega ma le fa'atinoina o le galuega fa'atonutonu i Faletupe Fa'apisinisi uma i totonu o Samoa i le tulaga talafeagai ma le lē faaituau.**

### **Fautuaga 3:**

**E fautuaina e le Komiti le Palemene ina ia talia le fautuaga a le Faletupe Tutotonu o Samoa ina ia faamatu'u mai ni vaegatupe mo le totogiina atu (fiscal stimulus package) mo nai tagata ta'itoatasi ma faipisinisi ua a'afia i le fa'ama'i e faaoga mai ai le Fa'alapotopotoga o Fa'alavelave Tutupu Fa'afuasei (ACC), ma ia auiliili ai mafuaaga talafeagai, aua a le gafatia e le pisinisi ona totogi le nonogatupe e ono aafia ai le tamaoiga o le atunuu.**

I le maea ai o iloiloga a le Komiti, e fautuaina ai le Fono Aoa ina ia faamaonia le P.P.2020/2021 Nu.106, Lipoti Faaletausaga a le Faletupe Tutotonu o Samoa 2019/2020 & Tausaga Faaletupe Faaiuina aso 30 Iuni 2020.

A o faagasolo le iloiloga a le Komiti, na mafua ai ona fofogaina faamatalaga molimau na tuuina mai e le Faletupe. Ma le agaga faaaloalo.

**FOFOGA FETALAI:** Malo faafetai i lau Afioga i le Taitaifono.

Ia, ou te tapa lau Afioga i le Sui Minisita o le Faletupe Tutotonu mo le tolaulauina o Tali a le Malo.

**Afioga Hon LEOTA LAKI LAMOSITELE (Sui Minisita o Tupe):** Faafetai mo lou avanoa lau Afioga i le Fofoga Fetalai.

E faatalofa atu foi i le paia o le Maota, aemaise foi le Tamaitai Palemia ma le mamalu o le Kapeneta, Minisita Lagolago. E faapena foi lena Itu o le tatou Maota i le Taitai o le Itu Agai ma sui usufono. Le tapuaiga foi a Ofisa Sili o Pulega o Matagaluga a le tatou Malo, ma nisi o tatou malo faaaloaloga o tatou faatasi i lenei taeao.

Ua ou tulai atu ma le faaaloalo e tuuina atu Tali a le Malo i le Lipoti a le Komiti o Tupe Maua ma Tupe Totogi, P.P.2020/2021 Nu.106 ma le P.P.2021/2022 Nu.24, Lipoti Faaletausaga a le Faletupe Tutotonu o Samoa mo le Tausaga Faaletupe 2019/2021 & 2020/2021.

## **FAUTUAGA A LE KOMITI O TUPE MAUA MA TUPE TOTOGI:**

### **Fautuaga 1:**

**E fautuaina le Komiti o le Faletupe Tutotonu o Samoa (CBS) ina ia faia ni auala e faamautinoa ai o lo o sologa lelei le mataituina o nonogatupe a Pisinisi o lo o a'afia le tamaoiga ona o le Koviti-19 aemaise lava i Faletalimalo ma le vaega o Tagata Tafafao Maimoa mai Fafu o lo o tele le a'afiaga ma le pagatia ona o le faama'i.**

### **Tali**

Ua faamauina fautuaga a le Komiti o Tupe Maua ma Tupe Totogi a le Palemene. E tali atu le Faletupe Tutotonu i fautuaga ua taua i luga e faapea:

- i. Fa'aaauuina le lipotiina e faletupe o fefa'atauaiga i le Faletupe Tutotonu i masina taitasi ae le o le tai-kuata e pei ona masani ai o nonogatupe a pisinisi e aofia ai faletalimalo ma tagata tafafao maimoa mai fafu faapea tagata ta'itoatasi ua a'afia (90 aso e le'i toe totogiina se tului po'o se tupe faavae) po'o nonogatupe ua amata ona faaletonu (30 aso e le i toe totogiina se tului po o se tupe faavae).
- ii. Fa'aaauuina le mataituina toto'o o alagatupe mo noogatupe a faalapotopotoga tau tupe e tusa ai ma aafiaga o le KOVITI-19 i le tamaoiga o Samoa. E faailoa atu mo le silafia e le Komiti mamalu, e

tusa ai ma Feagaiga na sainia i le va o le Faletupe Tutotonu o Samoa ma faalapotopotoga tau tupe (faletupe o Atinae a Samoa ma le Faalapotopotoga Tau Fale a Samoa) mo nei Alagatupe taitasi, e faamalosia ai le auina mai o lipoti i masina ma kuata taitasi. O nei Lipoti e atagia ai le faaaogaina ma le tualga lata mai o i ai paleni o nei nonogatupe na nonoina atu i tagata lautele. O le a faaauau foi ona faatino faatalanoaga ma le Faletupe o Atinae ia maua ai faamaumauga lata mai o tulaga o lo o i ai le gafatia e tagata na nono mai ai nei alagatupe le toe totogiina o nonogatupe nei, e tusa ai ma a'afiaga o le faama'i.

### **Fautuaga 2:**

**E fautuaina e le Komiti ina ia talia e le Faletupe Tutotonu o Samoa, ina ia fa'aauau le toe fa'amatuuina atu o fa'amanuiaga (staff benefits) i tagata faigaluega a le Faletupe Tutotonu o Samoa ma ni aiaiga e fa'atapula'a ai talosaga, ina ia tu'uititia ai le fememea'i solo o le aufaigaluega ma le fa'atinoina o le galuega fa'atonutonu i Faletupe Fa'apisinisi uma i totonu o Samoa i le tulaga talafeagai ma le lē faaituau.**

### **Tali**

Faamauina ma le toto'a le fautuaga a le Komiti o Tupe Maua ma Tupe Totogi a le Palemene.

### **Fautuaga 3:**

**E fautuaina e le Komiti le Palemene ina ia talia le fautuaga a le Faletupe Tutotonu o Samoa ina ia faamatu'u mai ni vaegatupe mo le totogiina atu (fiscal stimulus package) mo nai tagata ta'itoatasi ma faipisinisi ua a'afia i le fa'ama'i e faaoga mai ai le Fa'alapotopotoga o Fa'alavelave Tutupu Fa'afuasei (ACC), ma ia auiliili ai mafuaaga talafeagai, aua a le gafatia e le pisinisi ona totogi le nonogatupe e ono aafia ai le tamaoiga o le atunuu.**

### **Tali**

Ua faamauina foi le fautuaga a le Komiti a le Palemene ma e faaauauina le mataituina o alagatupe ma nonogatupe a Faalapotopotoga e tusa ai ma tulaga o le Koviti-19. Ua faamauina le fautuaga a le Komiti a le Palemene ina ia talia le fautuaga mo le faamatuu atu o vaegatupe ia ma o le a faapena ona faaauauina ai e le tatou faletupe le mataituina o le faagasologa o fesoasoani e ala atu i tupe a le Faletupe Tutotonu.

Tuuina atu ma le faaloalo.

**FOFOGA FETALAI:** Ia, malo saunoa i lau Afioga i le Sui Minisita o le tatou Faletupe Tutotonu e tusa ai foi o le Tali a le tatou Malo aua foi nisi o mataupu na laga ma fautuaina e le mamalu o le tatou Komiti.

Ia, talu ai o lea ua matau atu e le Nofoa ua tulata i le tatou taimi malolo. E i ai foi le fuafuaga, talosia ia lo outou soifua mo le aso a taeao mo le faaaauaina o le tatou galuega. A o le agaga ua matau atu o lea ua tulata foi i le tatou taimi malolo, ia ona faaaau ai foi lea o sausaunoaga a sui usufono mamalu o le tatou Palemene mo le aso a taeao.

O lea ua tatou oo mai i le tatou taimi manava o lenei aso. E momoli atu ai le faafetai a le Fofoga Fetalai i le lavapapale o le tatou Palemene mo le uunaia o le tatou galuega. E le toe tau faailo, o lea ua tau mai le faasologa o le tatou galuega i lenei masina faale-Fono i le iloiloaina o Lipoti a Komiti Faa-Palemene ma Tali a le tatou Malo. E ao pea ona ou toe faamanatu, o le mamafa lea o le galuega lea a le Palemene, ona o Lipoti uma lava, o le faatinoga o le pitolaau a le Malo, o lo o tauala mai i Lipoti Faaletausaga ina ua faasee atu i Komiti.

E i ai le talitonuga o lenei galuega o le a mafai ona momoli atu ai finagalo o le tatou Maota ma fautuaga lelei e silasila i ai le faigamalo mo le tapu'eina o le tatou tamaoaiga. O se uluai taimi foi lea ua toe foi ai le faagasologa o le tagofia o Lipoti a Komiti ma Tali a le Malo i le tulaga agatonu e pei ona faavae mai ai.

E momoli atu ai le faamalo ma le faafetai i Taitaifono faapea le tatou Malo mo le galuega i lenei aso, faafetai tapena mo taimi e soalaupule ai tatou Lipoti i totonu o le tatou Palemene. Ua faamalo le usufono i le tatou Maota, talosia ia le aso Fono a taeao e toe faaaau ai le tatou galuega.

Ae tatou te le i tolopo ou te tapa lau Afioga i le Sui Fofoga Fetalai mo se tatalo e faaiu ai le tatou Fono.

*Na tolopo Taulumaga a le Fono Aoao Faitulafono i le itula e 12:56 i le aoauli seia aulia le Aso Lulu, 08 Mati 2023 i le itula e 9:30 i le taeao.*